

نوری ریشماں

پنجابی نعتیہ قصیدہ

محمد اقبال نجمی

نوری رہنماں

نعتیہ قصیدہ

۱۴۲۸ھ

محمد اقبال نجمی

ایوان حمد و نعت گوجرانوالہ (پاکستان)

نام کتاب : نوری رہنماں
 لکھاری : محمد اقبال منجمی
 چھاپن ورہا : ۱۴۲۸ھ
 کستری : اک ہزار
 ہدیہ :
 چھاپن والے : ایوان حمد و نعت
 ۸۸۔ بی۔ سیٹلائیٹ ٹاؤن گوجرانوالہ
 فون : ۰۵۵۔۳۲۵۱۶۰۳

دور تارے

کتاب سرائے۔ الحمد مارکیٹ، غزنی سٹریٹ۔ اردو بازار لاہور

فون۔ ۷۳۲۰۳۱۸

نعت مرکز۔ المدینہ دارالاشاعت، یوسف مارکیٹ، غزنی سٹریٹ ۸۸۔ اردو بازار لاہور

فون۔ ۷۳۲۰۶۸۲۔۷۳۱۲۸۰۱

پیارے آقا
شفیع المذنبین، رحمت اللعالمین، راحت العاشقین
خاتم المرسلین ﷺ
دے حضور ”نوری رشتاں“ داند رانہ


سوہنے ہار سلا ماں والے خدمت وچ سرکاراں
صلو علیہ دا ورد پکاراں لکھ کروڑاں داراں

نوری ریشماں دے سر ناویں

- 9 نوری ریشماں دی برسات --- محمد اقبال نجی
- 11 نوری ریشماں دے نور نظارے --- غلام مصطفیٰ بھل
- 19 نوری ریشماں
- 25 نفس دا حال
- 28 باغ بہاری
- 30 عشق
- 32 سدا جیوندے لوک
- 34 نور نبی داسوہنا
- 37 سوہنا نام نبی داسوہنا
- 43 مٹھی مٹھی یاد نبی داسوہنا
- 45 روشن کھڑا
- 47 پیار دیاں انواراں
- 49 آپ ﷺ آئے تے
- 51 آپ ﷺ دے آیاں
- 61 کھڑیاں گلزاراں
- 63 مدحت پاک نبی داسوہنا
- 74 مدنی چن سرکاراں
- 87 درود و سلام
- 90 جہاد
- 92 قرآن پاک

95	آل پیاری پاک نبی ﷺ دی
97	اصحاب رسول ﷺ
101	آپ ﷺ دیاں گفتاراں
103	حدیث نبوی (ترجمہ)
112	سوہنے نام نبی ﷺ دے پیارے
133	معجزات
136	سراپا مبارک
144	دید دی تانگھ
146	مکہ پاک
149	مدینہ پاک
155	روضہ پاک
157	مسجد نبوی ﷺ
159	گنبد خضریٰ
161	فاران دے جلوے
163	عمر گزاراں
165	بخشو پیار بہاراں
167	سوہناسفہ
169	ربیع الاول
171	پاک نبی سرکاراں ﷺ
173	دعاواں





نوری رِشماں دی برسات

رب سوہنے دا بے انتہا شکر ادا کرنا چھے مینوں ایہ توفیق بخشی پئی نعتیہ قصیدہ ”نوری رِشماں“ لکھ کے آقا سوہنے ﷺ دے حضور پیش کر سکاں۔ کروڑاں وار درود تے سلام پیارے مدنی آقا ﷺ دی بارگاہ اقدس وچ جہاں دی نظر سولی ہوئی تے آپ ﷺ نے ایس اوگن ہار بردے نوں اپنی مدحت لئی قبول کیاتے ایسراں میں ”نوری رِشماں“ دے سرناویں لکھیا ہو یا نعتیہ قصیدہ آپ ﷺ دی بارگاہ ناز وچ پیش کرن دے قابل ہو سکیا۔

نعت دے ایہ نوری پھل آقا ﷺ سوہنے دی بارگاہ وچ پیش کردیاں ہونیاں میرا دل کائنات دی سبھ توں سونئی، نورانی، رحمتاں وئٹن والی ہستی دے حضور جھکیا ہو یا اے، اکھاں وچ محبت پاروں موتی ڈگدے پئے نیں۔ سرشاری دی ایس کیفیت نوں لفظاں راہیں بیان کرنا مشکل ہو رہیا اے۔ آقا ﷺ سوہنے دی محبتاں بھری بارگاہ دلوں ایہ توفیقاں عطا ہوندیاں نیں، مقدر راں دے ستارے چمکدے نیں تے فیر نعت چھے سوہنے پھلاں نال جھولی بھری جاندی اے۔ ”نوری رِشماں“ آقا ﷺ سوہنے مدنی من تھا ﷺ دی نذر کردیاں ہو یاں تصور وچ سوہنیاں جالیاں سامنے مولوہ پاک تے کھلو کے ہتھ بٹھے ہوئے نیں تے ہوٹھاں اُتے مٹھا مٹھا درود تے سلام دانغمہ جاری اے۔ جالیاں وچوں کھنڈ دے نور دی بارش ہو رہی اے۔ غلام اپنے آقا ﷺ کولوں منکدا جا رہیا اے آقا سوہنے ﷺ عطا فرماندے جاندے نیں، انج لگدا اے ویلاڑک گیا اے۔ ایہ نورانی تصور میری زندگی داسر مایہ اے۔ اللہ تعالیٰ اگے دعا اے پئی ایسے سوہنے نور دے ہالے وچ رہندیاں ہو یاں میری حیاتی دا ایہ سفر پورا ہووے۔

نعتیہ قصیدہ لکھن داشوق بڑے چر دادل وچ، ہمبلیاں ماردا سی خیال سی کہ بھرواں قصیدہ لکھیا جاوے اوڑک ایس سال اوس بارگاہ دلوں نظر سولی ہوئی۔ نعتیہ قصیدہ ”نوری رِشماں“ لکھنا شروع کیاتے وچ ہو روی گلاں بھجھدیاں گئیاں فیر ایسراں ہو یاں پئی نعتیہ قصیدہ لکھن دے نال نال قرآنی قصیدہ تے حمدیہ قصیدے دے شعر لکھن دی توفیق مل گئی قرآنی قصیدہ تے حمدیہ قصیدے داکم کتھے اپڑیا اے ایہ گلاں فیر ہون گیاں۔ نعتیہ قصیدہ ”نوری رِشماں“ اللہ سوہنے دی کرم نوازی تے حضور اقدس ﷺ دی رحمت دے طفیل چھپ کے تہاڑے ہتھاں وچ اے۔ ایہ نورانی قصیدہ لکھدیاں

ہو یاں مینوں کسے حوالے نال کوئی اوکھت نہیں ہوئی بڑے شوق تے محبت نال چالی پختالی دناں وچ ایہ نعتیہ قصیدہ مکمل ہو گیا۔ مینوں ایہدے مکمل ہون تے جھڑی روحانی خشی تے سرشاری ملی اودھا بیان لفظاں وچ کرنا مشکل اے دوستان نوں قصیدے دے کجھ حصے سنائے اودھناں بڑا پسند کیتا، ایسے دوران سراپا مبارک اک نعتیہ محفل وچ پڑھیا جنہوں سن کے محفل وچ آئے ہوئے سامعین بڑے خش ہوئے تے سارے لوکاں ایس نوں بڑا سراہیا۔ ایہ عوامی کامیابی دی میرے لئی خشی دا باعث سی۔ قصیدہ مبارک پڑھدیاں ہو یاں جے تہاڈیاں اکھاں پیارے آقا ﷺ دی محبت وچ بھج جاوون تے میں سمجھاں گا میرے لکھن دا حق ادا ہو گیا اے۔ تئیں ایس موقع تے میرے والدین لئی تے نبی رحمت ﷺ دی پوری امت واسطے ضرور دعا کریا جے۔ اللہ کریم سانوں سبھناں نوں اپنے حبیب پاک ﷺ دا صدقہ اپنی رحمت دے سایے تھلے رکھے۔ آمین

”نوری ریشاں“ دے لکھن یا چھپون وچ جے کوئی غلطی ہوئی ہووے تے اللہ کریم سوہنے مدنی پاک دے صدقے اوہ معاف فرمائے۔ میں اپنے استاد اکرم پروفیسر محمد اکرم رضا ہوراں داتے اپنے بزرگاں، دوستان محترم ثاقب عرفانی، محترم سلطان صبروالی، محترم سجاد مرزا، جناب عاطف کمال رانا، ڈاکٹر بشیر عابد، جناب غلام مصطفیٰ بکسل، ڈاکٹر ارشد محمود ناشاد، جناب احسان اللہ طاہر، جناب محمد انور رانا تے جناب امجد شریف دا بڑے محبت نال ذکر کرنا چاہواں گا جہاں ایس قصیدے نوں سراہیا، اپنی رائے دا اظہار کیتا، ایس دے پروف پڑھے تے مفید مشوریاں نال نوازیا۔

ڈاکٹر بشیر عابد تے غلام مصطفیٰ بکسل ہوراں دا خصوصی شکریہ۔ جناب غلام مصطفیٰ بکسل ہوراں نوری ریشاں بارے اپنے وچار لکھ کے میرا مان ودھایا اودھناں دے اکھر میرے لئی سرمایہ نیں، اودھناں نوری ریشاں دے پروف وی پڑھے تے قیمتی مشورے دتے۔ ڈاکٹر بشیر عابد ہوراں قصیدے دے سارے حصے گوہ نال پڑے تے قیمتی مشورے دتے۔ پروفیسر محمد اکرم رضا ہوریں وی خصوصی شکریے دے مستحق نیں جہاں کتاب بارے اپنی قیمتی رائے نال نوازیا۔ کمپوزنگ تے مکھ مہورت بنان وچ سجاد محمود ہوراں خصوصی دلچسپی لئی، میں اودھناں دا وی حد درجے شکر گزار آں۔ میری دعا اے پئی اللہ کریم مینوں تے سارے بزرگاں، دوستان نوں اپنے گھرتے نبی رحمت ﷺ دی بارگاہ دی حاضری نصیب فرمائے آمین۔

دعاواں دا محتاج

محمد اقبال نجمی

☆☆☆

”نوری ریشاں“ دے نورِ نظارے

محمد اقبال نجی اک اچہا بھاگاں والا جی اے جہدے دل وچ رب سوہنے دی محبت دا دیوا
جگ رہیا اے تے روح وچ مدنی من ٹھاٹھ ﷺ نال عشق تے ارادت دیاں جگمگاہناں دے جلویاں
نے اوہناں دی ذات نوں وی رشنا دتا اے۔ دل، روح تے سریر دی تڑپ، درد تے مہجوری دی
اگ وچ تپ کے نکھر جان دے گن لیکھاں والیاں دے حصے وچ ای آؤندے نیں۔ ادب محبت
دے قرینے دی پہلی پوڑھی اے ادب دی انتہا درد تے درد دی انتہا عشق دی ابتدا اے تے عشق
دی انتہا اپنی ذات نوں مٹاؤنا، مڈھلی شرط اے۔ سوہنے آق ﷺ دی محبت دا تقاضہ وی ایہو اے
جے اپنے ماں باپ، بہن بھائی، اپنی ذات، اپنی آل اولاد تے مال دولت کولوں ددھ کے اوہناں
دی ذات نال پیار کیتا جاوے۔ ایمان دا یہود و راجا حضور دی پہلی شرط اے۔

محمد اقبال نجی ہوراں رب سوہنے دی جگنی گاکے حمد چرغاں نال دلاں نوں رُشنا، ایس
دے نال نال حضور ﷺ دے حضور من موہ نعتاں لکھ کے سلا ماں دے پھل تے دروداں دیاں
ڈالیاں دی پیش کیتیاں، ہن اوہناں نعتیہ، قصیدہ، ”نوری ریشاں“ لکھ کے اپنے تریل دھوتے
اکھراں نوں حضور دی لذت توں آشنا کر کے اپنی ذات نوں وی نور پھہاراں نال مہکا لیا اے۔
جس پلے پھل بدھے ہوون آوے باس رومالوں

قصیدہ عربی زبان دا لفظ اے جہدے معنی مدح تے تعریف دے نیں پنجابی شاعری وچ
قصیدہ گوئی شخصیات دی تھان نعت رسول ﷺ دے حوالے نال جڑت رکھدی اے کیوں جے
پنجاب دے شاعر کدے وی حکومت تے دربار نال متعلق نہیں رہے اوہناں اپنے سورمیاں دے
جس ضرور گائے نیں۔ حضرت کعب بن زہیر، شیخ عبدالقادر جیلانی تے امام بوصری دے نعتیہ
قصیدیاں دے منظوم ترجمے پنجابی زبان وچ ڈھال کے ایس صنف نوں اگانہ نورن وچ مدد ملی
اے، ویکھیا جاوے تے نعت وی مدح رسول ﷺ دے زمرے وچ آؤندی اے۔ عربی نعتیہ
شاعری دا مڈھلا محرک وی ایہو اے۔ حضور نبی کریم ﷺ نوں سرتاج الانبیاء مٹھنا، اوہناں دے

معجزیاں، غزویاں، حسب نسب، حلم، حکمت تے اخلاق دا چرچا ورگے وشیان نوں اولیت حاصل رہی، جدوں نعتیہ شاعری عربی توں فارسی تے فیرو، پنجابی وچ لکھی جان لگ پئی، ویلے دے نال نال موضوعات وچ وسعت تے کھلار آؤندا گیا تے نعت مرح توں دکھ ذات تے کائنات تک اپنے اثرات مرتب کرن لگ پئی بقول ڈاکٹر آفتاب احمد نقوی۔

”زمانے دے اُتار چڑھاؤ تے مقام دے بدلن نال جدوں آپ ﷺ دی سیرت دے نوں نوں پہلو تے امکان ظاہر ہوئے تے آپ ﷺ دے حوالے نال تہذیبی، سماجی، تمدنی، معاشرتی، معاشی، سیاسی، تاریخی، قومی تے بین الاقوامی سطح تے احساس پروان چڑھیا تے بے انت موضوع نعت وچ داخل ہو گئے تے اج وی ہو رہے نیں تے آؤن دے ویلے وی شامل ہوندے رہن گے۔ انج نعت دے مضموناں وچ بے انت رنگارنگی تے تنوع نوں اسانی نال محسوس کیتا جاسکدا اے اے کیوں جے نعت آپ ﷺ دی مرح تے توصیف توں آؤ آپ ﷺ دی ذات مبارک، حیات، غزوات، معجزات، تعلیمات، عادات و معمولات دے ذکر دے نال نال شاعر دیاں شخصی وارداتاں تے کیفیاں دے بیان دے نال نال قومی تے ملی، مشکلاں تے مصیبتاں دے ذکر تے آفاقی تصورات و نظریات دے ان گنت پہلو نوں سلیقے تے قرینے نال اپنے اندر جذب کر چکی اے۔ (پنجابی نعت، تحقیق تے تنقید جازہ ۷، ص 27)

انج قصیدیاں دے وچ وی مرح دے نال نال موضوعات وچ وسعت تے کھلار آؤندا گیا۔ عربی قصیدہ چونہ جزاں نال ترتیب پاؤندا اے۔

۱۔ مطلع تے تشبیب ۲۔ گریز ۳۔ مرح ۴۔ مقطع تے دعا

ہر قصیدے دا مدھ تشبیب توں بھیا جاندا اے، ایس وچ حسن تے عشق دا بیان ملدا اے۔ قصیدے دی نعتیہ، عشقیہ تمہید یعنی تشبیب نے غزل دارو، وھار لیا، ایس توں مگروں شاعر اپنے اصل مضمون گریز ول ودھدا اے۔ عاشق اپنے ہجر نوں بیان دا، محبوب دے وچھوڑے وچ اوہدیاں نیڑلیاں وستیاں دے کیڑے کڈھدا اے تے اوہدیاں گلیاں دے نال نال اوتھوں دے ذریاں نوں وی احترام دا درجا دیدا اے کیوں جے اوس تھاں تے محبوب دیاں تلیاں لکیاں ہوندیاں نیں۔ نعتیہ قصیدیاں وچ وی شاعر حضور ﷺ دی نسبت پاروں مدینے دیاں گلیاں، بازار تے اوتھوں دے ذرے ذرے نال سانجھ ورسا کے من دی کلپنا نوں دور کر دے نیں تے انج مدنی

منٹھا رحمۃ اللہ علیہ نال اپنے عشق نوں بیان دے نیں۔ شاعر تشبیب لکھدیاں لکھدیاں اپنے ممدوح دیاں جدوں صفناں دا اظہار کر دے تاں اوہدا قلم اپنے ممدوح نال گل بات ٹورن دل ہو جاندا اے۔ ایس مقام تے شاعر اپنے نفس دی مذمت کر کے اپنی ذات دی اصلاح کر کے تشبیب توں گریز دل دودھ دے۔ تیجی منزل ممدوح دی مدح سرائی توں اگانہ دل پیر پندی اے جھیکولی پوڑھی یعنی مقطع تیکر رسائی حاصل ہوندی اے جتھے حضور سرور کائنات صلی اللہ علیہ وسلم دی ذات نوں وسیلہ متھ کے اپنی جھولی نوں پھیلا کے انفرادی تے اجتماعی طور تے دعا منگی جاندی اے۔

قصیدہ بردہ شریف دیاں دس فصلاں تے ذیلی سرائیاں اک سوٹھ نیں جدوں کہ محمد اقبال نجمی ہوراں اپنے قصیدے نوں فصلاں یاں ابواباں وچ لکھن دی بجائے 36 جلی سرخیاں دی شکل وچ سرائیاں درج کیتے نیں تے حضور صلی اللہ علیہ وسلم دی ولادت توں لے کے اجو کی صدی تیک بن والے سالاں دی نسبت نال 1481 مصرعیاں تے مشتمل ایہ نعتیہ قصیدہ مکمل کیتا اے انج شعراں دی کسری ست سو چالیس یاں اکتالیس بن دی اے۔ ہن تیک دی معلومات دے مطابق ترجمیاں توں ہٹ کے پنجابی ادب وچ کتابی شکل وچ جہڑے قصیدے سائے آئے اوہناں وچ

1- حضور صلی اللہ علیہ وسلم دے حضور، تنویر بخاری 1986ء

2- طلع البدر علینا، سید منصور احمد خالد 2006ء

تے ہتھلا مجموعہ ”نوری ریشماں“ شامل نیں۔ ایس توں دکھ عبدالباسط باسط دے نعتیہ قصیدے جہڑے اوہناں دی نعت دی کتاب جمال ربی جمال تیرا وچ شامل نیں۔ ڈاکٹر شہباز ملک ہوراں دی ترتیب دتی کتابیات جلد اول وچ وی قصیدہ جات (محمد دین مست لہر) قصیدہ رمضان المبارک (عمر دین جوگی) قصیدہ جان (مسلم اولیسی) تے قصیدہ الغیاثیہ (غلام محی الدین چشتی) بارے وی دس پائی گئی اے۔

محمد اقبال نجمی ہوراں نعتیہ قصیدے دی بحر میاں محمد بخش (سیف الملوک) والی یعنی ست فعلن رکھی اے تے قصیدے دی اصل ہیئت نوں برقرار رکھدیاں ہو یاں مردف تے غیر مردف ردیفال نوں ورتوں وچ لیاندا اے۔ تشبیب والے حصے وچ اوہناں نوری ریشماں دے سرائیاں نال رب سچے دی حمد چتا ردیاں ہو یاں روشن سیرت والی سرکار دی خدمت وچ سلام پیش کیتا تے فیر آپ صلی اللہ علیہ وسلم دے اصحاب، پیچتن پاک، بطحا دے ذریاں، غار حرا، آپ صلی اللہ علیہ وسلم دے خویش قبیلے،

آپ ﷺ دی بھر جوانی تے آپ ﷺ دے سوہنے ناواں نوں لکھ کے سوتر دی اُٹی لے کے قصیدہ نگاراں دی ٹولی وچ اپنے آپ نوں کھلھار کے نفس دے حال دے سرناویں توں تشبیب دامنہ بنھیا، ایس قصیدے وچ اوہناں اپنے سچے عاشق ہون دا ثبوت دتا اے۔ مدنی من شاہ ﷺ دی یاد وچ اوہناں اپنیاں سکاں، سوڑاں، مجبوری، دیدی تاگھ، من وچ اٹھن والے لہواں نوں اکھراکھ وچ دھر کے نمھے نمھے سیک نوں پڑھہنا راں دے دلاں وچ رکھ دتا اے۔ عشق دی معراج وی منکھ نوں او دوں حاصل ہون دی اے جدوں دھرتی دے جن دی محبت دے سوتے دل وچوں بھندے نہیں اتے روح تے سر ایہناں ”نوری ریشماں“ دے حصار وچ رہندے نیں۔ سوز، گداز، ادب، احترام، نیاز مندی قصیدہ گوئی دے موضوعات وچ شامل نیں، اہمدے نال نال دو جے پیغمبراں نالوں حضور ﷺ دی فضیلت قرآن توں ثابت ہونا، آپ ﷺ دی ذات دا کائنات دی تخلیق دا سبب بناتے خیر البشر ہون دے نال نال آپ ﷺ دے نور علی نور، ہون دا بیان وی شامل ہوندا اے۔ نجمی ہوراں ایہناں موضوعات نوں قصیدے وچ بیانایا اے ایس دے نال نال نعت دے مدھلے محرک حضور ﷺ دی پیاری ذات اوہناں دے سوہنے ناواں، دانشی دے نوری مکھڑے، آپ ﷺ دے دنیا تے تشریف لیاون، آپ ﷺ دے معجزات، غزوات، مکہ معظمہ، مدینہ منورہ، مسجد نبوی، گنبد خضریٰ، فاران دے جلوے، فلسفہ جہاد آپ ﷺ دی شرافت، شجاعت، خلق عظیم، علم، حکمت، انسانی ہمدردی، وعدے دی پاسداری تے اُمت نال پیار ورگے سرناویاں نال اپنیاں نوں لکھیاں سوچاں تے فکران دے پھل مہکا کے دلاں تے دعاں نوں معطر کیتا اے۔ بعض سرناویاں وچ اوہناں مردف تے غیر مردف ردیفان راہیں اپنیاں نوری فکران نوں اکھراں دا روپ دے کے دل دیاں لکھیاں باران نوں مہکاراں وچ بدل دتا اے۔ غیر مردف ردیف وچ قافیہ دی تنگی پاروں بعض قصیدہ گو شاعران دی عجز بیانی اوہناں نوں تکراری موضوعات نوں دہراون تے مجبور کر دیندی اے، محمد اقبال نجمی ہوراں ایس تھل نوں عبور کرن لکھیاں مردف ردیفان دی درتوں کر کے نہ تے تکراری موضوعات دی بے بسی دا شکار ہوئے نیں تے نہ ای کے فی اوکڑنے اوہناں دے قلم نوں سنگل پائے نیں۔

وگی لئی کجھ غیر مردف تے مردف ردیف دے شعر پیش کیتے جاندے نیں۔

نوری حرف حکایت لکھنا میرے دس دوج کھتے
من دوج پیار دادیپ جگا کے نعت لکھاں سرکاراں

عاشق پاک نبی دے جہڑے سچا عشق کماندے
دل دوج پیار دے پھل کھڑا کے پاندے باغ بہاراں

شان معراج عطا انج کیتی حیرت دوج خدائی
آپ نوں محرم راز بنا کے کیتیاں رب گفتاراں

آپ مبلغ، مومن کامل، واعظ، صادق، سید
آپ مکرم، آپ مبشر، صاحب دوج سرداراں

آپ ولی نیں ایسے جہڑے بھ دی راکھی کر دے
اپنے اک اک اُمّتی تائیں رکھدے دوج شماراں

(غیر مروف ردیف)

جان توں دودھ کے پیارا پیارا آپ داناں سرکاراں
تاج شفاعت سوہنا سوہنا آپ داناں سرکاراں

آپ آئے تے پائی رحمت و سیاں دل دیاں باراں
آپ نے آکے وڈی وحدت و سیاں دل دیاں باراں

میں کوچھی ساں روپ چڑھایا مدنی چن سرکاراں
وحدت والا جام پیا مدنی چن سرکاراں

سبھ تے کیتی سدا سخاوت مدنی چن سرکاراں
وٹھی سبھ وچ پیار دی دولت مدنی چن سرکاراں

لکھدا رہواں میں نعت مقالے انجے عمر گزاراں
نکدا رہواں اُس نور دے ہالے انجے عمر گزاراں

تھاڑے ناں دی تسی کردیاں میرا جیون لنگھے
اک اک ساہ انج کراں حوالے انجے عمر گزاراں

(مردف ردیف)

پنجابی ادب وچ معلوم قصیدیاں وچ محمد اقبال نجی ہوراں دا قصیدہ ضخامت دے نال نال فنی اعتبار نال وی اپنی اہمیت تے وقعت برقرار رکھدا اے۔ قصیدیاں دے انبر تے حالی اے کوئی کہکشاں نہیں بنی کیوں جے ایہناں دی کسری تن چار توں نہیں ودھ سکی مگر فنی تے فکری اعتبار نال دیکھیا جاوے تے نجی ہوراں دے ایس قصیدے ”نوری رشتاں“ دے اکھر اکھر وچ اک نویں کہکشاں جگمگاندی نظر آؤندی اے۔ سوہنے نبی کریم ﷺ نال محبت داسچا اظہار اوہناں دے سچے پریکی ہون دے نال نال اک سچے مسلمان ہون دی گواہی وی پیش کردا اے۔ رب کریم نے قرآن اندر سورہ الاحزاب دی چھینجی آیت وچ آپ سرکار ﷺ تے درود تے سلام بھیج دیاں ہویاں مومنناں نوں وی حکم دتا۔

”پیشک اللہ تعالیٰ تے اوہدے فرشتے حضور نبی کریم ﷺ تے درود بھیج دے نیں اے ایمان والیو! تسبیحیں وی درود تے سلام بھیجو“

محمد اقبال نجی ہوراں دروداں تے سلاماں دیاں ڈالیاں پیش کر کے سوہنے آقائے ﷺ نال اپنی نسبت جوڑ دیاں ہویاں اپنے ایمان تے وجدان نوں وی قائم رکھیا تے قصیدہ گوئی وچ نعت دے محتاط رویاں نوں وی موہرے رکھیا۔ حضور ﷺ نوں تمام جہاناں واسطے رحمت بنا کے گھلایا گیا۔ جدول رب سچا اوہناں دی نعت پڑھدا اے تے خاکی لئی بڑا ضروری اے جے نعت لکھن لکیاں خیالاں، فکر اں تے اکھراں وچ وی محتاط رویہ اختیار کرے۔

ہزار بار بشویم وہن ز مشک و گلاب
ہنوز نام تو گفتن کمال ہے ادبی است

ایہ بارگاہ محمدی ﷺ اے جتھے

ادب گاہست زیر آساں از عرش نازک تر
نفس گم کردہ می آید جنید و بایزید اینجا
ایس منزل تے غالب ور گے مہان شاعر دقلم لرز لرز جاندا اے۔
غالب ثنائے خواجہ بہ یزداں گزاشتیم
کہ آں ذات پاک مرتبہ دالہ محمد است

سرکار دی مدحت سرائی محتاط رویے تے محبت دے تقاضیاں دی منگ کردی اے کیوں جے
ایس درتے فرشتے وی پو لے پیریں آؤندے نیں جنید اتے بایزید ور گے اُچی ساہ نہیں لیندے۔
ساڈے شاعر نے محبت تے احتیاط دے سارے انگاں نوں لکھ رکھ دیاں ہویاں قصیدے دے
سارے لوازمات پورے کیتے نیں۔ قصیدے دے انت وچ نجمی ہوراں مسلم اُمہ نوں درپیش
مسئلیاں، اوکڑاں تے استمداد دی چکی وچ پس کے زوال دے درد سمندر وچ گھرن پاروں
سرکار ﷺ دے حضور تے، ہاڑے التجاواں تے دعاواں واسطے اپنی جھولی نوں پھیلا کے لہو دے
اتھرواں نال اکھرا کھرنوں رت بھیندا کرتا اے۔

مکدی گل ایہ محمد اقبال نجمی ہوراں دے نعتیہ قصیدے ”نوری ریشماں“ وچ عشق داک بیکراں
جہان سانوں اپنے پورے باکپن نال نت نویاں انگاں دے لشکارے دیندا دسد اے۔ اوہناں
اندر محبت دیاں سکاں دی نویکلتا اک اجے رنگ وچ دیکھی جاسکدی اے جہدے وچ سانوں
حضور ﷺ دی ذات، صفات تے سنیے دے بھرویں رنگ دکھائی دیندے نیں اوہناں دے
شعراں وچ من دی ہوک، ناگھ دی کوک بن کے ساہویں آؤندی تے من دیاں رنجھاں دی کلپنا دا
جیوند اجاگد اُروپ بن جاندی اے۔ اکھراں دے ایس چانن وچ تن من نہال ہو کے فکراں دے
انبراں تے آپ دے عشق دیاں تحریریاں بن کے جگمگاؤندا اے۔

تھاڈے ناں دی تسی آقا ساڈا ورد وظیفہ

محمد اقبال نجمی ہوراں دے اندر اک سچا مومن صوفی تے باصفا مسلمان لکھیا ہویا اے۔ اودھ

نعتیہ قصیدے دے من موہ شعراں وچ جتھے دربار رسالت ﷺ دے دناں راتاں تے مڑاں،
 صحابیوں دیاں فکران نوں الیکدے نیں او تھے ای اوہناں دے اندر دے ہاڑے تے تانگھاں وی
 ایہناں شعراں وچ اپنیاں لبو آں بھرے سیک نال اک بھرویں ریت بن کے ساہنے آؤندیاں
 نیں۔ سوہن سلکھنے، من بھاوے نئے جی جان دے اندر دی آواز ایہ شعر سانوں عشق دے تریل
 دھوتے پھلاں داگوں اپنیاں مہکاراں دیندے پیار کرن والیاں دے اندر نوں مہکاؤندے نیں۔
 رب سوہنے اگے دعا اے پئی جسراں حضرت امام شرف الدین ابو صیری دے قصیدہ
 بردہ شریف نے بارگاہ رسالت ﷺ وچ منظوری پائی تے اوہدی فکری فنی عظمت اج تیک دلاں
 دے زنگ لاہ رہی اے ایس نوری قصیدے نوں وی حضور ﷺ دی منظوری نصیب ہووے تے
 دل والیاں لئی ایہ نور بھہاراں پیار و طیفہ بن جاوے۔ آمین

غلام مصطفیٰ البمل

.....☆.....☆.....

بسم الله الرحمن الرحيم

نوری ریشماں

نعتیہ قصیدہ



پہلاں سبھ توں نال ادب دے رب دی حمد چٹاراں
فر میں نعت نبیٰ دی لکھاں اپنا آپ نکھاراں

آپ دی روشن سیرت والے رنگاں دے وچ رنگ کے
منزل دے دل ٹردا جاواں اپنے بخت سنواراں

لکھاں وار سلام میں بھیجاں آپ دی خدمت اندر
جپ کے آپ دا نام وظیفہ اپنا سینہ ٹھاراں

سوہنے مدنی مائی توں میں جاواں صدقے واری
جس دے آؤن دا صدقہ ملیاں ایہ سبھ نور انواراں

خدمت دے وچ آقا دی میں نور درودی گھل کے
کر لاں سینہ نور خزینہ پاواں نت بہاراں

پیار سلامی ادھناں دے لئی پھل جہاں نے کیتی
جہاں آپ دا ساتھ نبھایا جھلے دکھ ہزاراں

آل نبی دے نال میں اپنی چاہت سانجھی کر کے
اپنی سوچھ فکر نوں دیواں سوہنیاں نور پھہاراں

چنچتن دا میں پیار وسا کے اپنے ساہواں اندر
اپنی روح دی کیاری تائیں کر دیواں گلزاراں

پاک اصحابؔ دے قدام دی میں مٹی چم چم چمکاں
جہاں نوں چکایا میرے مدنی چن سرکاراں

بطحا دے ہر ذرے نال آں عشق میں اس لئی کردا
سوہنے آقاؔ اوس فضا وچ آپؔ دیاں مہکاراں

بھاگاں والا گھر اوہ ساراؔ سوہنا پاک قبیلہ
آپؔ دا پیارا بچپن گزریا جہدیاں وچ بہاراں

پتھر ٹیلے غار اوہ سوہنے آپؔ دا کلمہ پڑھدے
دیکھنؔ جھومنؔ روون وانگوں آپؔ دے خدمت گاراں

آپؔ دی پاک جوانی سوہنیؔ پیار سپین سوہنا
سوہنا مکہ شہر نبیؔ دا ونڈے شان وقاراں

سوہنا آپؑ دا خویش قبیلہ ، سوہنے سنگھی ساتھی
 سوہنی بی بی پاکؑ ملی۔ جس دتیاں چین قراراں

غار حرا دا کیہ پچھدے او جس دے اُتے اُترے
 نوری اسم اوہ سارے جہاں وٹیاں نوری دھاراں

نوری حرف حکایت لکھنا میرے دس وچ کتھے
 من وچ پیار دا دیپ جگا کے نعت لکھاں سرکاراں

میں تے آپؑ دا اسم الاواں امرت رس ایہ پیواں
 ایس بہانے چمکن دم دم میرے دل دیاں تاراں

میں ایہ چاہواں آپؑ دا مینوں بردہ سارے آکھن
 میرے سرتے بنھ دیو آقاؑ پیار دیاں ایہ دستاراں

111324

سوہنے لفظاں نال سجاویاں میں ایہ ”نوری ریشماں“
پیش نیں آقا خدمت دے وچ سوہنیاں نور پھہاراں

پیار محبت ، خشبو ، مہکاں سک دا رنگ چڑھا کے
پیش نیں آقا خدمت دے وچ پیار دیاں انواراں

نال ادب دے لے کے آیا مدحت دا ایہ تحفہ
پیش نیں آقا خدمت دے وچ نعت دیاں مہکاراں

ایہناں ولیں نظر سولی پاؤ مان ودھاؤ
جدھر جاؤں ، دل نوں بھاؤں ، بخشو شان وقاراں

اوگن ہار اس بردے تے وی پیار دی بدلی چھائے
نور شفاعت بخشو اس نوں دیوؤ لطف دیداراں

”نوری ریشاں“ دے سرناویں لکھیا نعت قصیدہ
اس تھیں نور شفاعت پا کے اپنے بخت سنواراں

میں سوتر دی اٹی لے کے لگا وچ قطارے
پاک نبی دی شان کیہ لکھنی میں چہ اوگن ہاراں

مٹے پھٹے حرفاں تائیں جوڑ کے خوش پیا ہوواں
خورے کوئی مل پا دیون پاک نبی سرکاراں

سوہنے آقا سہا منے تہاڈے نفس دا حال کیہ دساں
دنیا مگر نسائے مینوں رکھے وچ آزاراں



نفس دا حال

نفس دا حال کیہ دساں جو اے بھریا نال شراراں
 کیہتے جس نے کاج نکمے جہڑا وچ بیماراں

اگلی منزل نیڑے آئی عمل نہ کوئی وی پلے
 نفس پلٹ پیا کردا دیکھو کسراں اے یلغاراں

عملاں باجھ خواری لبھنی کدی نہ ایہ گل سوچی
 کدے نہ کیتا جتن کوئی پئی اپنے بخت سنواراں

تیرے نفس نے دتے تینوں کنے زہر پیالے
 ایہدے پچھے لگ کے گل وچ توں پائیاں نیں ہاراں

اپنے نفس نوں پاک کرن لئی تیتھوں کجھ نہ سریا
توں ابلیس دے پچھے لگ کے کھویاں شان وقاراں

تینوں خوب دھیانے لایا نفس دے مکراں پھندیاں
ہور کسے دی گل سنی نہ سنیاں پیار پکاراں

کنا ہور توں خوار اے ہونا چھٹے کے سدھیاں راہواں
کد تک دے کے رکھیاں انج ای نفس دے ہتھ مہاراں

کھٹ لے بھادیں کنے اوگن تیرا رنج نہیں ہونا
بھکھی اکھ دے پچھے لگ کے رہنا نال گنواراں

ہن کجھ عمل کما لے چنگے توڑ کے نفس دا پھندا
دھکے دے ابلیس نوں ڈھا دے جھوٹھ دیاں دیواراں

استغفار دا ورد پکا ہن تاں جے جیون بیٹری
نیکی والے بحر اچ ٹھلے پاوے پیار حصاراں

پاک نبی دی مدحت والی تسی کرنا سکھ لے
اُچے اُچے ایس عمل تھیں نٹھیاں ملن ہزاراں

پاک نبی دی مدحت کر کے لا توں باغ بہاری
سوہنے پیارے ایس عمل تھیں کھڑدیاں نیں گلزاراں



باغ بہاری

چھم چھم نیچیاں وچ چمن دے آکے پیار بہاراں
کھلی پائی رل مل سبھناں پھلاں ، کلیاں ، خاراں

بگنی ، ماہیے ، ڈھولے ، پٹے ، نال بخشی دے گائیے
جس پاسے وی تکیا اودھر کھڑیاں سن گلزاراں

مستی دے نال جھوم رہیا سی دھرتی دا ہر ذرہ
جج دھج اپنی خوب دکھائی سوہنیاں سبزہ زاراں

لالیاں پھٹیاں ، رونقاں اٹھیاں ہر ہر بستی وچوں
رحمت والے بدل وسے پیٹھیاں دھوڑ غباراں

اپنے دل دی تئس مٹائی نہا کے شجراں حجراں
رحمت کھنڈی چارے پاسے بجھ گئیاں سن ناراں

نخسبو لٹھی رحمت نے جد اپنے رنگ چڑھائے
نخسبیاں خوب منائیاں سبھی سکیاں تے اغیاراں

عرش تے نوری، فرش تے خاکی، دوویں راضی ہوئے
دنیا اُتے رحمت و نڈن آ گئیاں سرکاراں

سوہنے پاک محمد ﷺ سرور نور دے ہڑ وگائے
مے توحیدی آ ورتائی وچ ککے دیاں باراں

آپُ دا ثانی آپُ دا سایا ویکھن وچ نہ آیا
ہر اک سچے دل نوں موہیا آپُ دیاں گفتاراں

عاشق پاک نبی دے جہڑے سچا عشق کماندے
دل وچ پیار دے پھل کھڑا کے پاندے باغ بہاراں

.....☆.....☆.....

عشق

عشق نبیؐ نوں سینے لایئے پائیے باغ بہاراں
صلوٰۃ علیہ واورد پکائیے چلیے پھل مہکاراں

رب دی مرضی اوہو جہڑی اُس سوہنے دی مرضی
ودھ کے سبھ توں آپؐ نوں چاہئے تیکے نت گلزاراں

آپؐ دی ذات جہاناں اُتے سوہنی تے من موہنی
آپؐ دے عشق اچ ذات گوائیے چمکن دل دیاں تاراں

جے کر چائیے ہووے کوئی نظر عنایت والی
عشق نوں فر ایمان بنائیے روشن کریئے باراں

یاد اُس سوہنے آقا دی ہن ہر پل دل وچ رکھیے
آپ دے عشق اچ جان لٹائیے پائیے شان وقاراں

اوس نخی دیاں سچیاں باتاں اُچیاں شاناں سبھ توں
اُس دے منگتے جے بن جائیے رہیے وچ حصاراں

نہ کوئی آیا نہ کوئی آنا آپ جہیا اس جگ تے
آپ دے عشق اچ جلھی پائیے کھلرن نور پھہاراں

سدا جیوندے لوک اوہ جہڑے آپ دے سچے عاشق
آپ دے اُسوہ پاک تے چلیے رہیے وچ گلزاراں



سدا جیوندے لوک

جہاں کول اے نور ہدایت رہندے وچ گلزاراں
جہاں اُتے کرم عنایت پاندے نور پھہاراں

وچ دعاواں آپ دا آقا پا کے پاک وسیلہ
جو چمکاون اپنی قسمت رہندے وچ حصاراں

اپنی موتے مزدے جاندے جھوٹھ دے چیلے سارے
جہاں کول اے آپ دی سیرت پاندے شان وقاراں


آپ نوں اپنا رہبر من کے کملی والے آقا
جہڑے آپ دی کرن اطاعت روشن کر دے باراں

لے کے تانگھاں دیدیاں تے شوق تھیں قدم اٹھا کے
صلن اللہ دا ورد پکاندے اوہ پاندے مہکاراں

سدھیاں راہواں پا گئے جہاں کلمہ آپ دا پڑھیا
جہاں کول اے آپ دی چاہت بخشیاں پان ہزاراں

آپ دی کملی دا سایا ای چین دلاں نوں بخشے
جہاں پائی آپ دی رحمت پا گئے نور بہاراں

سارے جگ نوں پیا مہکاندا نور نبی دا سوہنا
جہاں کول ایہ سوہنی دولت رہندے وچ گلزاراں



نور نبیؐ دا سوہنا

سارے جگ تے نور نبیؐ دا پاوے پیا جھلکاراں
طیبہ نگری ونڈیاں جانڈیاں پل پل موہ مہکاراں

نور نبیؐ تھیں مولا سائیں عالم کل سجائے
نور نبیؐ دا ونڈیا رب نے اپنے وچ دلداراں

حسن اے جہڑا وچ جہاناں نور نبیؐ دا صدقہ
نور نبیؐ تھیں پایاں سبھ نے اتھے نور انواراں

ازلاں توں اے چمکن والا آپؐ دا نور نیارا
آپؐ دے سوہنے نور دے صدقہ چمکن دل دیاں تاراں

آپؐ نے بخشے دنیا تائیں آ کے نور اُجالے
جہدا سبھ تھیں چائن ہويا جھدیاں سبھ لشکاراں

ورق ورق قرآن دا آقاؐ آپؐ دا ذکر چترے
چمبے نوری حرفاں تائیں نور دیاں گفتاراں

کیتا اے کردار نوں سوہنا تے گفتار نوں مٹھا
آپؐ دی سیرت پاک معطر آپؐ دے نور افکاراں

فتنے جال وچھاندے پئے نیں آقاؐ چار پھیرے
نور تہاڈے پاروں ای سبھ رکنیاں ایہ یلغاراں

ساڈے لئی سبھ لطف لٹائے سوہنے نوری چن نے
سوہنے نور دے کارن و سدیاں رہن سدا ایہ باراں

ہر شے توں ودھ آقا تہاڈے نور دی دولت بھاری
اس نوں میری جھولی پاؤ ایہو عرض گزاراں

تہاڈے نور دکھائی سانوں راہ شفاعت والی
تہاڈے نور ای حشراں دے وچ لیاں ساڈیاں ساراں

سوہنے نور نے بھر دتے نین سبھناں دے ای دامن
سوہنے نور نے روشن کیتیاں ساڈے دل دیاں غاراں

تہاڈے نور دا سوہنا چائن جدھر کھنڈا جاوے
اودھر اودھر ہوندیاں جاون ویکھیاں باغ بہاراں

سوہنے نور چوں چکاں مارے سوہنا نام نبی دا
سوہنے نام نوں چسے جد وی خوشیاں ملن ہزاراں

.....☆.....☆.....

سوہنا نام نبیؐ دا

جان توں ودھ کے پیارا پیارا آپؐ دا ناں سرکاراں
تاج شفاعت سوہنا سوہنا آپؐ دا ناں سرکاراں

آپؐ دے ناں دا صدقہ ساڈے عیب نے دھوتے جاندے
کردا سانوں ہریا بھریا آپؐ دا ناں سرکاراں

ساڈی اکھ نوں ٹھنڈ پچاوے دل نوں چین وی بخشے
ساڈی قسمت دے لئی تارا آپؐ دا ناں سرکاراں

آپؐ دا کیتا سوہنے رب نے ایسراں ناں اے اُچا
سوہنے کلمے پاک اچ لکھیا آپؐ دا ناں سرکاراں

ہوٹھاں اُتے آ گیا اُس دم صل اللہ دا نغمہ
آپ دے پیاریاں جد وی سنیا آپ دا ناں سرکاراں

اودوں دے ای پھل نکھرے نیں ہر اک ڈال اے لہکی
جد دا ایہناں لینا سکھیا آپ دا ناں سرکاراں

آپ دے ناں تھیں ملیا مجھ نوں نور اے سوہنا پیارا
چمکاں ماردا سبھ نے ڈٹھا آپ دا ناں سرکاراں

مہکاں ونڈ دے اوہو جگ تے پھلاں وانگ نیں دیکھے
نال عقیدت جہاں چمیا آپ دا ناں سرکاراں



نام نبیؐ دا ساڈے دل نوں دیوے پیار بہاراں
نام نبیؐ تھیں روشن ہوئیاں ساڈیاں سوچ وچاراں

نام نبیؐ تھیں دل دا موسم ہوئے خوب سہانا
نام نبیؐ اے مٹھا مٹھا سینہ اس تھیں ٹھاراں

نام نبیؐ تھیں عرش فرش سبھ روشن خوب نیں ہوئے
نام نبیؐ دا نور خزانہ ونڈے نور انواراں

نام نبیؐ تھیں جگمگ جگمگ سارے منظر لگدے
نام نبیؐ دا چپے جے کر روشن ہوں افکاراں

ہر اوکڑ ای دور چہ ہوندی خوف دلاں چوں نسدا
صدق یقین دا بوٹا پنگرے پیٹھن دھوڑ غباراں

وچ جہاناں سبھ توں روشن نام محمد ﷺ پیارا
ایسے سوہنے ناں دا صدقہ و سدیاں دل دیاں باراں

مٹھاتے من تھار ایہ ناواں خوب دلاں نوں بھاندا
ایسے ناں نے اوڑک لینا سانوں وچ حصاراں

نام نبیؐ دے نقش مشور ویکھ رہیاں ہر پاسے
نام نبیؐ دے سوہنے منظر، سوہنیاں نیں مہکاراں

نور و نور زمانے نوں اے نام نبیؐ دے کیتا
نام نبیؐ دے سوہنے اکھر و تڈوے نوری دھاراں

ہوٹھاں اُتے پھٹدے رہندے نام نبیؐ دے جھرنے
نام نبیؐ دا نور و طیفہ دور کرے آزاراں

میرے گھر اچ عشق نبیؐ دا چائن کھنڈے کھلے
نام نبیؐ تھیں ہر پاسے ای پھیلن نور پھہاراں

پلکاں اُتے پیار نبیؐ تھیں موتی رهندے چھلکے
نام نبیؐ تھیں بھاگ جگاواں اکھیاں نوں میں ٹھاراں

سوہنے لفظاں نال بناواں نعت نبیؐ دے گجرے
نال عقیدت اوہناں نوں فر چماں میں سرکاراں

نام نبیؐ تھیں صدق صفا دے چشمے دل وچ پھندے
نام نبیؐ تھیں روگ میں کٹاں بیڑی پار اُتاراں

امکاناں دے بوہے سارے ایسے ناں تھیں کھلدے
ایہ دے نور منارا سبھ لئی ایہدے نال بہاراں


ایسے ناں دے لشکارے نیں ویکھ لئو سبھے پاسے
ایہو ناں ای تکیا اے میں اُچّا وچ سرداراں

ایہو ناں ای سبھناں دے لئی سوہنیاں چھاواں ونڈدا
ایہو ناں ای آگو سبھ دا اُچّا وچ درباراں

نام نبیؐ دا چپا اے جد مذحت دے در کھلے
نام نبیؐ نے آ ورتائیاں نور نبیؐ دیاں دھاراں

نام نبیؐ دا ساہویں رکھے ایہ وے پاک وظیفہ
نام نبیؐ نے چمکائیاں نیں ساڈے دل دیاں تاراں

نام نبیؐ دا جد وی لئیے یاد نبیؐ دی آوے
مٹھی مٹھی یاد نبیؐ وچ صبح و شام گزاراں



مٹھی مٹھی یاد نبی دی

یاد نبی نے چائن بخشیا کھڑیاں سوچ وچاراں
دل وتی وچ ایہدے تائیں لائے رنگ بہاراں

رہی نہ حاجت دارو دی تے نہ ای لوڑ طہیاں
یاد نبی تھیں راحت پائی ورہیاں دے بیماراں

دل دی کالک دھوتی جہاں آپ دا دامن پھڑیا
یاد نبی نے جت اچ بدلیاں متھے لکھیاں ہاراں

آپ دی یاد توں غافل ہویاں بھیڑی حالت ہوئی
کول نیں جذبے سیتل سیتل زنگ لکیاں تلواراں

یاد نبی ایمان ودھاندی دل نوں نور تھیں بھردی
یاد نبی وچ محو نہیں جہڑے پاندے پھل مہکاراں

یاد نبی دے پھل سوہنے وی رکھدے شان نرالی
ایہناں تائیں جد وی چیمے کھڑدیاں نیں گلزاراں

یاد نبی دی جہان کول مانے جگمگ جگمگ کردے
یاد نبی دی سینے لا کے اپنے بخت سنواراں

یاد نبی دی عشق دی ٹیسی اُچ مقام اڑاوے
یاد نبی دی پیار دا تحفہ دیوے دید بہاراں

روشن مکھڑا آپ دا پیارا وچ خواہاں دے ویکھاں
یاد نبی دی پاک وظیفہ بخشے نور پھہاراں

.....☆.....☆.....

روشن مکھڑا

نور دا پیکر روشن مکھڑا اُچّا وچ سرداراں
دل دا محور روشن مکھڑا لیندا سبھ دیاں ساراں

جس دی دید لئی پل پل ترے ویکھاں دنیا ساری
پاک معطر روشن مکھڑا ونڈے پیار بہاراں

ساڈے سبھ دے تے بھاگ جگادن والا جہڑا
نور مبشر روشن مکھڑا سوہنا وچ گلزاراں

چین دلاں دا بن کے آیا بلجا ماوئی ساڈا
مہر منور روشن مکھڑا پاوے نور پھہاراں

روشن مکھڑے دنیا اُتے آ کے نور چہ ونڈیا
سبھ دا ناصر روشن مکھڑا رکھدا وچ حصاراں

خلق دی خشبو ہر تھاں ونڈے رحمت راحت بخشے
شان مدثر روشن مکھڑا سوہنے نقش نگاراں

ساڈا سبھ دا سچا ہادی ، کمی ، مدنی ، ماہی
اکمل رہبر روشن مکھڑا ونڈدا جو دستاراں

جہدے ہتھ اے سبھ مختاری سیرت جہدی پیاری
شافع محشر روشن مکھڑا دیندا شان وقاراں

اُمی داعی ، ہادی ، حامی ، عاقب ، شاہد ، حاشر
برتر بہتر روشن مکھڑا خوشیاں دوے ہزاراں

رحمت بن کے آیا ، سبھ نوں راحت دیون والا
مشفق ، مظہر روشن مکھڑا ونڈے پیار انواراں

.....☆.....☆.....

پیار دیاں انواراں

آپُ نے آقا جدوں دکھائیاں پیار دیاں انواراں
خوش بختاں نے جھولی پائیاں پیار دیاں انواراں

آپُ دے ساہویں بیٹھ کے سبھ نے آپ نوں رج رج تکیا
دل دیاں اکھیاں وچ وسائیاں پیار دیاں انواراں

آپُ دا ذکر کراں تے میری رہندی اے روح زندہ
آپُ دی مدحت تھیں مہکائیاں پیار دیاں انواراں

آپُ دے سبھ صحابہ چمکن جیویں روشن تارے
آپُ دا نور ہدایت سائیاں پیار دیاں انواراں

تن سو تیرہ مومنؑ نکلے جوش ایمانی لے کے
اوہناں اُتے رب دوسائیاں پیار دیاں انواراں

ساڈے اُتے انج حضوروں کرم دی بارش ہوئی
ساڈے لئی جا رب توں پائیاں پیار دیاں انواراں

شام عمر دی ڈھل چلی اُنے پیارے مدنی ماہی
اک واری فر بخشو سائیاں پیار دیاں انواراں

تحفہ ہار دروداں دا میں لے کے آیا آقا
میرے اُتے ہوں سوائیاں پیار دیاں انواراں

آپؐ آئے تے بخشش والا سانوں مان اے ملیا
آپؐ دے آیاں جھولی پائیاں پیار دیاں انواراں

.....☆.....☆.....

آپؐ آئے تے

آپؐ آئے تے پائی رحمت وسیاں دل دیاں باراں
آپؐ نے آ کے ونڈی وحدت وسیاں دل دیاں باراں

با ادباں نوں ملیاں تھواں آپؐ دی بیٹھک اندر
با ادباں نوں مل گئی چاہت وسیاں دل دیاں باراں

صدق صفا دیاں مہکاں ونڈیاں آپؐ نے دنیا اُتے
پا کے آپؐ دی پیاری صحبت وسیاں دل دیاں باراں

دنیا سی اک تپدا صحرا آپؐ نے کرم کمائے
دتی آپؐ نے سونہی سیرت وسیاں دل دیاں باراں

مُنوں ناز اے پاک محمد ﷺ میرے آقاؑ مولاً
آپؐ دے آیاں چمکی قسمت وسیاں دل دیاں باراں

ہر پاسے ای پھیلے سوہنے آپ دے نوری جلوے
پائی آپ دی پیاری سیرت وسیاں دل دیاں باراں

پیار دیاں سوغاتاں تائیں لوکاں دامن بھر لئے
آپ نے ونڈیا نور شفاعت وسیاں دل دیاں باراں

آپ دے آیاں کھلے ہر تھاں نور ایمان دے جلوے
دور چہ ہو یا شرک جہالت وسیاں دل دیاں باراں

آپ آئے تے انساناں نے اپنی ذات پچھانی
پھر گئی سبھ دے دل دی رنگت وسیاں دل دیاں باراں

آپ دی چاہت دور چہ کہتے سبھ دی روح دے جالے
سبھ نے پائی عزت عظمت وسیاں دل دیاں باراں

آپ دے آیاں پھیلے ہر تھاں سوہنے نور سویرے
عالم عالم ہو گئی رحمت وسیاں دل دیاں باراں

.....☆.....☆.....

آپؐ دے آیاں

آپؐ دے آیاں ڈھے گئیاں سبھ کفر دیاں دیواراں
آپؐ دے آیاں سبھ پاسے ای ہوئیاں نور پھہاراں

آپؐ دے آیاں روشن ہوئیاں ساڈے دل دیاں باراں
آپؐ دے آیاں رب نے وٹھیاں پیار دیاں انواراں

آپؐ نے آن دسائی دل وچ نور ایمان دی طاقت
آپؐ دے آیاں بخشش پائی سبھے اوگن ہاراں

آپؐ نے پاک قرآن دے راہیں سوہنا چائن وٹھیا
آپؐ دے آیاں ہر پاسے ای ہوئیاں نور انواراں

آپؑ نے اپنا علم ، حلم اس دنیا وچ ورتایا
آپؑ دے آیاں روشن ہوئیاں سبھ دے دل دیاں تاراں

آپؑ نے دیا فقر لباده ہر خلعت توں بھارا
آپؑ دے آیاں لے لوکاں پایاں شان وقاراں

آپؑ دی صورت تکی جھئے آپؑ دے نیڑے ڈھکیا
آپؑ دے آیاں سمھناں تائیں ملیاں باغ بہاراں

چارے پاسے کھنڈیا آقا آپؑ دا سوہنا چانن
آپؑ دے آیاں اس دھرتی بنے کیتیاں ہار سنگھاراں

آپؑ نے دیا باجھ عمل دے بندہ بے اتارا
آپؑ نے وڈیاں آکے سبھ وچ سوہنیاں نور افکاراں

آپُ دا اُسوہ نور دا چشمہ ساڈا کل سرمایا
آپُ دے آیاں ساڈے اُتے ویاں نوری دھاراں

آپُ نے دیا ناکارہ اے دولت والا نشہ
آپُ دے آیاں جاگیاں سبھے ستیاں دل دیاں تاراں

آپُ دی نظر سولی پاروں دلاں دی دنیا بدلی
آپُ دے آیاں سبھے پاسے کھڑیاں پیار بہاراں

آپُ دا رنگ ای غالب آیا سبھ رنگاں دے اُتے
آپُ دے آیاں سبھ پاسے ای کھلریاں نہیں مہکاراں

آپُ نے دتی نویں حیاتی مویاں مکیاں تائیں
آپُ دے آیاں سمھناں پاسے ہوئیاں نور انواراں

کفر مٹایا دنیا اُتوں آپؐ نے ماتی بن کے
آپؐ دے آیاں سبھ لوکان دے چمکیاں دل دیاں تاراں

میرے آقا سبھ دیاں آکے بدلایاں نیں تاثیراں
آپؐ دے آیاں ہر پاسے توں دور ہوئیاں اشراں

وج کلیسیاں بجھی اگ جد آپؐ دی آمد ہوئی
آپؐ دے آیاں کفر شرک دیاں بجھ گئیاں سبھ تاراں

آپؐ آئے تے سوہنے رب تھیں مڑ کے رشتہ جڑیا
آپؐ دے آیاں لوکان دیاں بدلایاں سوچ وچاراں

آپؐ جیا انساناں نے پہلاں کدوں سی تکیا
آپؐ دے آیاں سبھ پاسے ای چڑھ گئے رنگ ابتاراں

آپُ دے آیاں رحمت پیچی ہر اک دل دی کیاری
آپُ دے آیاں ہر اک دل وچ پیاں ٹھنڈاں ٹھاراں

آپُ دے آیاں وچ فضا دے خشبو رچی سونی
آپُ دے آیاں آپ دیاں ای ہویاں ذکر اذکاراں

آپُ نے آکے خوشبو بھریا چانن ای ورتایا
آپُ دے آیاں روشن ہویاں سھے لیل نہاراں

آپُ دی ذات ملی تے عالی شان قیادت لہھی
آپُ دے آیاں خوشی منائی سکیاں تے اغیاراں

دھیاں تائیں اُچے رتبے آپُ نے آن دوائے
آپُ دے آیاں مہراں پایاں پھلاں کلیاں خاراں

آپُ دے آیاں بخشش دا اساں موتی جھولی پایا
آپُ دے آیاں سنانوں ملیاں مدنی چن سرکاراں

آپُ دے آیاں جگ دیاں سبھے رتاں نکھر گئیاں
آپُ دے آیاں ہو گئیاں اتھے چھاواں تے چھتاراں

آپُ دے آیاں جھولی دے وچ پے گئے نور سویرے
آپُ دے آیاں دنیا اُتے چمکے رنگ نگاراں

آپُ دے آیاں دنیا اُتے تھوڑ رہی نہ کوئی
آپُ دے آیاں ونڈیاں گئیاں پیار دیاں دستاراں

سچ نوں سبھے عزتاں شاناں آپُ نے آ کے دتیاں
آپُ آئے تے ڈھے گئیاں سبھ جھوٹھ دیاں دیواراں

آپُ دے آیاں مکیاں جگ توں سہے ای تکراراں
 آپُ دے آیاں ہر پاسے ای کھڑیاں گلزاراں

آپُ دے آیاں جگ دے اُتوں جھوٹھ کھلارا مکیا
 آپُ دے آیاں سبھ پاسے ای کھڑیاں پھل مہکاراں

آپُ دے آیاں سوہنے آقا بھیرا ویلا ثلثیا
 آپُ دے آیاں سبھ پاسے ای اتریاں باغ بہاراں

آپُ دے آیاں چارے پاسے سوہنا چانن کھنڈیا
 آپُ دے آیاں سبھ پاسے ای ملیاں نور انواراں

آپُ دے آیاں رحمت والا ہر دروازہ کھلیا
 آپُ دے آیاں کفر دیاں سبھ ڈھے گلیاں دیواراں

آزادی دا نعرہ ایتھے آپ دے آیاں وجیا
آپ دے آیاں کھل سمیاں آزادی لئی منقاراں

کمزوراں بے زوراں تائیں عزم سہارا ملیا
آپ دے آیاں عزت پائی کمزوراں ناداراں

ہر اک آفت دور چہ ہوئی خوف دلاں چوں نسیا
اک اللہ دا پیار وسایا دل دے وچ سرکاراں

آپ نے کیتے ہو پاسے ای نور دے چشمے جاری
علم تے حکمت ونڈی آپ نے چمکیاں دل دیاں تاراں

آپ نے دسیا لوکاں تائیں رب اے کہڑا تہاڈا
آپ نے آ ورتائیاں ایتھے توحیدی افکاراں

پیار سلیقے دنیا نوں سبھ آپ نے ای سکھلائے
آپ نے ونڈیاں وچ غلاماں عشق دیاں پرکاراں

آپ آئے تے اس دنیا دا چہرہ سوہنا سجیا
آپ دے آیاں دھرتی اُتے ہوئیاں نور پھہاراں

آپ دے آیاں رحمتاں والا ہر تھاں بدّل دیا
آپ نے آکے جگ تے ونڈیاں پیار دیاں مہکاراں

پھل نبوت والے آپ نے سبھناں وچ ورتائے
سبھ دی جھولی پائیاں آپ نے نور دیاں چمکاراں

آپ دے آیاں مولا سوہنے ساڈا شرف ودھایا
آپ دے آیاں سوہنے آقا روشن ہوئیاں باراں

پاک ارواحاں ایہ پھل سوہنے چم چم اکھیں لائے
جگمگ کیتا اوہناں تائیں آپ دیاں جھلکاراں

جن ساتھی متر پیارے سبھ دا بخت جگایا
سبھناں تائیں نور چہ وٹیا مدنی جن سرکاراں

ہینیاں نوں اُچیاںیاں والے تاج شہانے دتے
آپ نے آکے بخشیاں سبھ نوں دکھریاں شان وقاراں

دل دیاں باراں ویاں سبھ آپ دے آیاں آقا
آپ نے آچکایاں سبھ ساڈے دل دیاں باراں

آپ دے آیاں دنیا اُتے رحمت دا مینہ ورھیا
آپ دے آیاں سبھ پاسے ای کھڑ پیاں گلزاراں

.....☆.....☆.....

کھڑپیاں گلزاراں

آپُ آئے تے اس گلشن وچ لتھیاں باغ بہاراں
آپُ دے آیاں سبھ پاسے ای کھڑپیاں گلزاراں

آپُ دے آیاں جگمگ جگمگ سارا منظر ہویا
آپُ دے آیاں سبھ پاسے ای کھڑپیاں گلزاراں

آپُ دے آیاں میرے آقا سوہنے موسم ہوئے
آپُ دے آیاں سبھ پاسے ای کھڑپیاں گلزاراں

آپُ نے نور ہدایت وڈیا ، روشن عالم ہوئے
آپُ دے آیاں سبھ پاسے ای کھڑپیاں گلزاراں

آپُ دے آیاں کھنگر جئے پل وچ ریشم ہوئے
آپُ دے آیاں سبھ پاسے ای کھڑپیاں گلزاراں

سبھ نبیاں دے میرے آقا آپؐ ای خاتم ہوئے
 آپؐ دے آیاں سبھ پاسے ای کھڑ پیاں گلزاراں

آپؐ دا آکھا منن والے سبھ توں اکرم ہوئے
 آپؐ دے آیاں سبھ پاسے ای کھڑ پیاں گلزاراں

امی بن کے جگ فوج آئے آپؐ معلم ہوئے
 آپؐ دے آیاں سبھ پاسے ای کھڑ پیاں گلزاراں

ملک عرب دے ذرے چکے اختر انجم ہوئے
 آپؐ دے آیاں سبھ پاسے ای کھڑ پیاں گلزاراں

آپؐ دی مدحت پاروں سبھ نوں عزتاں شاناں
 آپؐ دے آیاں سبھ پاسے ای کھڑ پیاں گلزاراں

.....☆.....☆.....

مدحت پاک نبیؐ دی

آپؐ دا اُسوہ سامنے رکھیے رہیے وچ حصاراں
جھولی پائیے نور خزانہ چمکن دل دیاں جلیلیں

آپؐ دے اُسوہ پاک تے چل کے روح دی بھکھ مٹائیے
رحمت والے بدل و سن مہکن باغ بہاراں

پاک نبیؐ دے کلمے والا دم دم ورد پکائیے
پیار شگوفے پنگرن ہودن ہر پاسے گلزاراں

تقوے دی پنڈ بھاری بھاویں اس نوں سرتے چا سکے
جدھر جائیے پیار لٹائیے ونڈئیے نور مہبھاراں

نور نبیؐ جو سانوں دتا لوکاں تیک اپڑا کے
ایس ویلے نام لکھائیے آپ دے خدمت گاراں

پاک نبیؐ دے خلق دی سوہنی سبھ نوں جھلک دکھائیے
نعت نبیؐ دی رل مل گائیے، چمکن دل دیاں باراں

جام محبت والے مٹھے بھر بھر کے درتائیے
سچے دین دی راکھی کریئے ونڈیئے نور افکاراں

علم تے حکمت والے قصے آؤ فر دہرائیے
علم دی بیڑی شوہ سمندر پائیے بن پتواراں

آؤ آقاؐ مدنی کولوں پیار دی خیر چہ منگیے
طیبہ نگری ولوں پائیے پیار دیاں انواراں

بھل بیٹھے آں درس اوہ جہڑا سبھ نوں یاد کرایے
تیکے پاک مدینے ولیں کھڑکن دل دیاں تاراں

وج جہالت رہ کے اپنا آپ تباہ نہ کریے
علم تے حکمت دولت ساڈی کریے نہ انکاراں

دین دی رسی گھٹ کے پھڑلاں نعرہ حق دا لا کے
پاک نبی جی ، پاک نبی جی ، کلمہ حق چتاراں

اوہناں لئی لکھ وار سلاماں جہڑے جان توں پیارے
پاک درود دے تحفے بھیجاں لکھ کروڑاں واراں

چم چم اکھیں لایے ساوے گنبد دی ہریالی
عشق اچ اپنے آپ نوں رنگے پائیے چین قراراں

پاک نبی دے تائیں دسیے حال ہن اپنا سارا
آؤ کہیے آقا تائیں کرم کرو سرکاراں

آؤ نہیرے دور نسیئے نوری رشاں تائیں
آؤ دل دیاں اکھیاں کھول کے رسیے وج بیداراں

چاہت والیاں پکیاں مہراں لائیے اپنے دل تے
اودھے در تے ترلے پایئے وانگوں اوگن ہاراں

عقلاں دے نہ کچھے ٹریئے پندھ آسان چہ کریئے
عشق نوں اپنا رہبر متھیے پھریئے عشق مداراں

آقا سوہنے دے در جا کے منگاں دید حضوری
پاک نبی تھیں دل مہجور دا کھول کے حال گذاراں

پوریاں ہوں سبھ دعاواں پاک نبی دے صدقے
پاک نبی دے صدقے ای سبھ سجیاں سر دستاراں

طیبہ ولس نظراں چک کے آؤ ورد پکائیے
آؤ کہیے ہر ویلے ای مدنی چن سرکاراں

آپ دے درتوں منکن لکیاں کدے وی نہ شرمائیے
نال محبت ، عجز دے کہیے بخشو کجھ سرکاراں

آقا کولوں رج رج منگیے پیار ، شفاعت ، چاہت
اوتھوں نور خزینے ملدے سبھ نوں بن مقداراں

اپنے آپ نوں سدا اڈائیے پیار دے انبراں ولس
سوہنے پاک دا ناں ای چپے اپنیاں وچ گفتاراں

رحمت و نڈن والے کولوں رحمت منگیے سارے
پاک درود سوغاتاں گھیلیے خدمت وچ سرکاراں

شوق دلاں دے پورے ہوندے اوتھے جا کے سارے
اوتھوں پیار شفاواں پایاں سمھناں ای بیماراں

پاک نبیؐ جیہا ہور کوئی نہ سوہنا تے من موہنا
رب نے ذکر بلند اے کیتا پاک نبیؐ سرکاراں

آپؐ دے نام صفاتی پڑھ لو اک توں اک سوایا
وچ قرآن دے رکھیاں سمھے آپؐ دیاں انواراں

شان عطا معراج انج کیتی حیرت وچ خدائی
آپؐ نوں محرم راز بنا کے کیتیاں رب گفتاراں

رب بخشے اوہ جھولی پاوے ونڈی جانڈے سبھ تھیں
آپؑ نیں قاسمؑ، رحمت عالمؑ، مدنی چن سرکاراں

ختم نبوت آپؑ تے کیتی سوہنے مولا سائیں
آکھے رب خدائی اپنی پاک حبیبؑ توں واراں

سبھ اعجاز نیں آپؑ دے سچے آپؑ جیہا نہ کوئی
آپؑ دے ناویں جند ایہ لاواں سارے بھار اُتاراں

آپؑ بہادرؑ، آپؑ نیں عادلؑ، غیب نوں جانن والے
جو قرآن مجید اے دسدا کیویں دلوں وساراں

رحمت والا تاج پوا کے آپؑ نوں گھلیا رب نے
پاک نبیؑ دی آن دے اُتوں جان تے جند میں واراں

شان نبی دے بارے کرے کدے تعجب ناہیں
رب ای جانے شان نبی دی رکھدا جو ابصاراں

پاک نبی دا سیناں اندر آؤ پیار رچائیے
آپ دا پیار ای روشن کردا فکراں تے افکاراں

نور نبی دے تائیں کرے روشن آل دوالا
نور نبی تھیں روشن کرے اپنیاں سوچ وچاراں

آپ دی رحمت رافت سبھ لئی گوڑھیاں چھاواں وٹڈے
آپ دی رحمت رافت روکے کفر دیاں یلغاراں

آپ دی ذات نوں اشرف متھے دل دے روگ گوائے
پیارے آقا سانوں رکھن اپنے وچ دلداراں

آپؑ دا شان بیان نہیں ہونا لکھ میں کرنا چاہواں
آپؑ دا شان بیان کراں تے اپنا سینہ ٹھاراں

آپؑ محبوب تے محرم رب دے ہور گوڑ کئیہ لانا
آپؑ دیاں سوہنیاں کر کر گلاں اپنے بخت سنواراں

خُلق سمندر آپؑ دا سارے نبیاں نالوں اُچا
مینوں خُلق سمندر وچوں دیوہ نور پھہاراں

عظمت آپؑ دی رب ودھائی جہوا شاناں والا
آپؑ دا صدقہ سانوں وی تے خیراں ملن ہزاراں

آپؑ دا شان بیان نہیں ہويا ٹلھ غلاماں لائے
آپؑ دی عظمت اگے جھکیاں سخن دیاں رفتاراں

کنے لوکاں بحر کھنگالے آپ دی عظمت والے
تھکے ہارے لوک وچارے کردے کیہ اظہاراں

اک اک ناں دی کھوج اج ڈبے تہ تک جانہ سکے
جبرائیل دی پہنچ توں اُتے آپ دیاں انواراں

آؤ اپنی چاہت تائیں شوق دے پر ہن لا کے
پاک درود وظیفہ کریئے ، پہنچے وچ درباراں

آؤ رب دے پیارے تائیں سارے ترلا پایئے
دل شیشے نوں صاف کرایئے اترن دھوڑ غباراں

آؤ اپنا آل دوالا ایراں ہن رشنایئے
آؤ میل ادہ لایئے جھڑی لائی اے زرداراں

اوہناں نال تعلق اپنا جیوں جیوں پکیاں ہونا
تیوں تیوں ساڈے دل دے اندر کھڑیاں نیں گلزاراں

ہور دوارہ کوئی نہیں ایسا پوری کرے جو حاجت
پاک نبی دے پاک دوارے اپنے بخت سنواراں

دل دی تانگھ اے او سے در تے ساہ ایہ پورے ہوون
آقا دل دے اس جذبے نوں رکھو وچ حصاراں

صلیٰ علیٰ دا سوہنا نغمہ سارے رل کے گائیے
آؤ اوس دوارے جا کے منگیے پھل مہکاراں

آپ دے پیار دی تانگھ تمنا دون سوائی ہووے
آپ دے ذکر تھیں راحت پاواں مدنی چن سرکاراں

.....☆.....☆.....

مدنی چن سرکاراں

میں کو جھی ساں روپ چڑھایا مدنی چن سرکاراں
وحدت والا جام پیایا مدنی چن سرکاراں

سچ دی ڈھال دے نال ای ڈکے جھوٹھ دے سارے حملے
حق دا سورج آ چکایا مدنی چن سرکاراں

وہاں، خواہشاں، حرصاں، ہوساں روگ سی کنے لگے
دل دا ہر اک روگ مٹایا مدنی چن سرکاراں

جہاں تائیں ننڈیا جگ نے ماڑا جان کے اتھے
اوہناں تائیں گل نال لایا مدنی چن سرکاراں

جنگل ، بیلے، باراں دے وچ آپ دا ناں پیا گوئے
ہر دل اندر پھل کھڑا مدنی چن سرکاراں

ہر اک قول مبارک آپ دا سورج وانگ اے روشن
بے وصفان نوں وصف سکھایا مدنی چن سرکاراں

سوئے آپ دے ناواں اندر ہر اک روگ دا چارہ
ایہناں دا میں ورد پکایا مدنی چن سرکاراں

وہم گماناں اندر لوکی ٹردے پئے سن اتھے
صدق یقین دا دیپ جگایا مدنی چن سرکاراں

آپ دے مٹھڑے بولاں دا سبھ امرت رس نہیں پیندے
دل دا سارا زہر گویا مدنی چن سرکاراں

آپُ دی رحمت پاروں صحرا گلشن دے وچ بدلے
پتھراں نوں وی موم بنایا مدنی چن سرکاراں

”میں“ دی ذات دے پنجرے اندر قیدی سن سبھ اتھے
سبھ نوں جیون ڈھب سکھایا مدنی چن سرکاراں

آپُ دی ہستی مان عنی کمزوراں بے زوراں دا
ماڑیاں تائیں گل نال لایا مدنی چن سرکاراں

آپُ دی بوہنی سیرت دے پھل دنیا تے جو کھلے
اوہناں نے ای جگ مہکایا مدنی چن سرکاراں

سوہنے نور نے ہر پاسے ای اپنیاں رشاں وٹھیاں
عرشاں، فرشاں نوں رشیایا مدنی چن سرکاراں

ہر مشکل وچ آپ دی رحمت سایا کردی ڈھی
جندڑی تھل نوں باغ بنایا مدنی چن سرکاراں

آپ دے ہوٹھاں اُتے آ کے حرف سنہرے ہوئے
معنیاں وی اتار اے پایا مدنی چن سرکاراں

سوہنے سہج سہانے ہر اک تلخی نوں کٹ دتا
سم نوں شیریں آپ بنایا مدنی چن سرکاراں

دنیا والے انج لگدا سی تپدے تھل وچ پھر دے
آپ دی ذات نے کیٹا سایا مدنی چن سرکاراں

اپنے رنگ وچ رگن دے لئی سبھ اصحاباں تائیں
پگ پگ اپنے سنگ ٹرایا مدنی چن سرکاراں

آپ دے پیار دی جھیل دے اندر جھڑا پھل دی تریا
 جھوم جھوم کے اوہ لہرایا مدنی چن سرکاراں

کالی رات کفر دی اندر جھڑے لوک سی ستے
 اوہناں تائیں آن جگایا مدنی چن سرکاراں

ویر کماون جھڑے لوکی خیراں اوہ وی پاون
 انج دا پیارا سبق پڑھایا مدنی چن سرکاراں

اوہو انج زیارت گاہاں جتھے قدم چہ رکھے
 غاراں دا وی شان ودھایا مدنی چن سرکاراں

یاد انج کملی والے دی ایہ اکھاں جل تھل ہوئیاں
 ہجر دا بخشیا اے سرمایا مدنی چن سرکاراں

اُمّت دی غم خواری دے لئی اتھر کیر کے اکھیوں
اُمّت دا اے مان ودھایا مدنی چن سرکاراں

سبھ نبیاں دے میرے آقا آپ ائی خاتم ہوئے
آپ دا رنگ ائی غالب آیا مدنی چن سرکاراں

آپ دے پیار دا صدقہ سانوں ہر شے اتھے لیسھی
نور تھیں دامن پُر فرمایا مدنی چن سرکاراں

اوہنوں نویں حیاتی لیسھی اوہو اکرم ہويا
جہڑا پاک دوارے آیا مدنی چن سرکاراں

آپ دے آیاں میرے آقا سوہنے موسم ہوئے
کیتا جگ دا روپ سوایا مدنی چن سرکاراں

آپؑ دا اُمّتی بن کے اساں تے سؤنی دولت لہی
ساڈے دل دا میل گویا مدنی چن سرکاراں

رات دینیں میں کراں وظیفہ آپؑ دے سوہنے ناں دا
آس مری نوں ہے رشتایا مدنی چن سرکاراں

قول مبارک آپؑ دے سارے سچائی دے زینے
علم خزانہ خوب لٹایا مدنی چن سرکاراں

آپؑ دی رحمت برکت صدقے شہرگراں سبھ دسدے
جگ وچ ہر تھاں چانن لایا مدنی چن سرکاراں

عزت شان ملی اے ساتوں آپؑ دی ذات دے پاروں
ڈبدا بیڑا پار لگایا مدنی چن سرکاراں

آپؐ دے درتوں خیراں پاؤں بھٹکیاں نظراں سمجھے
امر شفا دا آ ورتایا مدنی چن سرکاراں

رحمت والے باب چہ کھولے آپؐ نے دھرتی اُتے
ذرہ ذرہ خوب سجایا مدنی چن سرکاراں

ازلی نور نے آ کے وٹڈیاں ہر تھاں تے رشنایاں
سوہنے خلق دا مینہ ورسایا مدنی چن سرکاراں

بن کے رہبر آپؐ نے سانوں نور بصیرت دتا
پڑھ کے ربی حکم سنایا مدنی چن سرکاراں

ہر محتاجی دور اے کیتی لطف عطاواں کر کے
جیون وادی پیار وسایا مدنی چن سرکاراں

عرشاں اُتے نقش جمائے آپؐ دے سوہنے قدماں
 اوہنوں اپنا فرش بنایا مدنی چن سرکاراں

دید نبیؐ دی خاطر عرشی صفاں سی بندھ کھلوتے
 شان جدوں معراج دا پایا مدنی چن سرکاراں

نعت مبارک بھڑے لکھدے اوہناں تائیں ہتھیں
 مدحت والا جام پلایا مدنی چن سرکاراں

بلھاں اُتے آن توں پہلاں پوری کیتی رب نے
 ہتھ دعا لئی جدوں اُٹھایا مدنی چن سرکاراں

آپؐ دا سوہنا اُسوہ ای بس ساڈا کل سرمایا
 جس تھیں دل نوں اے رشنایا مدنی چن سرکاراں

میں آکھاں پئی سبھ لوکاں توں میرے لیکھ نہیں چنگے
میرے من دا شہر وسایا مدنی چن سرکاراں

وگڑے کم سنوارے سارے پاک وسیلے تائیں
دل والا ہر روگ مٹایا مدنی چن سرکاراں

پیار دی سنگھنی چھاں اے کیتی میرے سر دے اُتے
ہر خاہش نوں توڑ چڑھایا مدنی چن سرکاراں

آرپ دے نور نے دنیا تائیں خشبو بھریا کیتا
وج دلاں دے نقش جمایا مدنی چن سرکاراں

آپ دی کملی ڈھکدی پئی اے ساڈے عیاں تائیں
نور شفاعت دا ورتایا مدنی چن سرکاراں

رحمت، راحت، عزت، دولت پل پل اوہنے کھٹی
پاک دوارے جہڑا آیا مدنی چن سرکاراں

آپ دے آیاں سانوں رب دی سوہنی ذات چہ لہی
ساڈا رب نال میل کرایا مدنی چن سرکاراں

جہاں جیون بیڑے ٹھیلے آپ دی وچ غلامی
اوہناں اپنا شان ودھایا مدنی چن سرکاراں

اپنی جان دے ویریاں دے لئی آپ نے رحمت منگی
اپنا سوہنا شان دکھایا مدنی چن سرکاراں

لات منات دے بتاں تائیں توڑیا اگے ودھ کے
اکو رب دے پچھے لایا مدنی چن سرکاراں

اک دو جے دے خون دے ویری لوکاں تائیں کسراں
بھائی بھائی آن بنایا مدنی چن سرکاراں

جہڑا آپ دے کول آ ڈھکیا اوہو آپ دا ہویا
آپ نے اوس تے کیتا سایا مدنی چن سرکاراں

حلم دے پیکر، علم دے مخزن، رحمت دے نیں محور
ہر اک ذرے نوں چکایا مدنی چن سرکاراں

ازلاں توں اے جاری ساری آپ دے نور دا چشمہ
ہر اک جی نے فیض اٹھایا مدنی چن سرکاراں

ذہناں وچوں مفروضے سبھ آپ نے آکے کڈھے
حق سچ دا عرفان کرایا مدنی چن سرکاراں

رگ رگ دے وچ رچیا ویا آپؑ دا ناں ای سوہنا
چین دلاں نے جس تھیں پایا مدنی چن سرکاراں

ایہ اعجاز وی آپؑ دا آقا ساری دنیا من دی
ڈبڈے سورج نوں پلٹایا مدنی چن سرکاراں

آپؑ دے سوہن غے دنیا تائیں خوشبو بھریا کیا
ہر تھاں سوہنا نقش بنایا مدنی چن سرکاراں

بن کے رہبر آپؑ نے سانوں نور بصیرت دتا
آپؑ دا مولا شان ودھایا مدنی چن سرکاراں

آپؑ دے ذات تے آقاؑ سوہنے لکھ کر وڑ سلاماں
ہار درودی عرشوں آیا مدنی چن سرکاراں

.....☆.....☆.....

درد و سلام

سوہنے ہار سلاماں والے خدمت وچ سرکاراں
صلوٰ علیہ دا ورد پکاراں لکھ کروڑاں داراں



مدنی خیر اناماں دے لئی سوہنیاں نور پھہاراں
آپ دے سوہنے ناماں دے لئی سوہنیاں نور پھہاراں

طیبہ پاک توں جہڑیاں آدن مہکاں ونڈدیاں واواں
اوہناں دے اکراماں دے لئی سوہنیاں نور پھہاراں

طلع البدر علینا جتھے بچیاں سی رل گایا
اوہناں روشن باباں دے لئی سوہنیاں نور پھہاراں

لکھ کروڑ سلام محبت سوہنی جالی تائیں
ہادی نور مداں دے لئی سوہنیاں نور پھہاراں

احمد تے محمودؑ، محمد ﷺ، طیبؑ، طاہرؑ، حامد ﷺ
سوہنے سوہنے ناماں دے لئی سوہنیاں نور پھہاراں

منبر تے محراب اودہ اعلیٰ، گنبد خضریٰ پیارا
اچے پیار مقاماں دے لئی سوہنیاں نور پھہاراں

روضے پاک نوں چمن آکے جہڑیاں نال محبت
اودہناں فجراں شماں دے لئی سوہنیاں نور پھہاراں


اکھیاں دی اودہ ٹھنڈک نالے چین دلاں دا ساڈے
آپ دے سبھ اقداماں دے لئی سوہنیاں نور پھہاراں

آپؑ دے روضہ پاک تے آون پیار سلام وی جنے
اوہناں پیار سلاماں دے لئی سوہنیاں نور پھہاراں

آپؑ دی بیٹھک اندر بیٹھ کے جہڑے موجاں مانن
اوہناں لعل بداماں دے لئی سوہنیاں نور پھہاراں

جہڑیاں مُشکاں ونڈیاں جاون آپؑ دے صدقے آقاؑ
اوہناں مشک مشاماں دے لئی سوہنیاں نور پھہاراں

وچ غلامی رہ کے آپؑ دی سدا جہاد جو کردے
اوہناں پاک غلاماں دے لئی سوہنیاں نور پھہاراں



جہاد

سوہنے رب دی یکتائی دیاں بھر کے سبھ انواراں
عشق نبیؐ دا رنگ چڑھا کے لے کے نور مہہاراں

نیکی دے دل ٹردے رہیے نفس تے قابو پا کے
نال برائی لڑدے رہیے رہ کے وچ حصاراں

جہڑی اوکڑ آوے اوہنوں ہنس ہنس سینے جریے
شکر گزاریے سوہنے رب دا پایے شان وقاراں

مال متاع اولاد تے جاناں اُس دے ناویں لایے
ایہدی کجھ تشہیر نہ کریے واگوں اوگن ہاراں

اپنے اک اک ساہ دی کرئیے پل پل جے رکھوالی
فیر جہاد اے پورا ہوندا بدن سوچ وچاراں

عالی رتبہ پاون لئی اے کنڈے چگنے پیندے
جہڑے اوہدی راہ تے ٹردے پاون دُکھ ہزاراں

ایویں تے نہیں ایڈی اُچی نور دی نعت لبھدی
ایویں تے نہیں اوہدے ولوں ملدیاں پیار اتاراں

موہوں اُف نہ کرئیے نہجی رہیے صابر بن کے
ملدا رتبہ عالی اے فرچمکن دل دیاں تاراں

علم قرآنی پڑھیے جے کر جذبے پکے ہوندے
نور ایہ دل وچ رچ جاوے تے کردا دور آزاراں

.....☆.....☆.....

قرآن پاک

نور صحیفہ نور نوں ملیا آئیاں نور بہاراں
نوری لہنوں لے کے آیا جگجگ ہوئیاں غاراں

ایہ جد نور پہاڑ نے تکیا اوہ وی نوری ہویا
نور ایہ کھنڈیا جتھے جتھے کھڑ پیاں گلزاراں

حرف حرف تے نقطے ایہدے رکھدے شان نرالی
مشرق مغرب روشن کیتے ایہدے نور انواراں

حق تے باطل دوہاں تائیں ایہ وے کھول وکھاندا
رحمت ' راحت ونڈدا پل پل اپنے وچ دلداراں

نال فصاحت نال بلاغت اک اک پارہ بھریا
دور جہالت کیتی جگ توں ایہدے نور افکاراں

ایہوں اپنی وچ حفاظت مولا سائیں رکھیا
ایہدا ہر اک قول اے فیصل اُچا وچ درباراں

نیکاں پاکاں لوکاں لئی اے خوب ہدایت ونددا
ایہدے نور نے روشن کیتیاں ساڈے دل دیاں باراں

ایہدے قاری شرفاں والے ، حافظ سوہن سنکھڑے
اس توں راحت ، رحمت پائی عمراں دے بیماراں

ایہ اعجاز اے پاک نبی دا دیندا ایہ تنویراں
ایہدی حکمت نال ای چمکن سبھ دے دل دیاں تاراں

ایہدے نور تھیں روشن کریئے آؤ چار پھیرا
ایہدے نور دے تائیں ڈھائیے جھوٹھ دیاں دیواراں

علم خزانے ایہدے اندر سوہنیاں صفتاں والے
اوہو پاندے جہڑے کردے اس تے سوچ وچاراں

توڑ قیامت ایہدے حکماں دنیا اندر چلنا
ایہدے اندر نور الہی حکمت بھریاں دھاراں

حکم ربانی سوہنا اُسوہ دوویں اس دے اندر
ایہ اک سوہنی نعمت بخشی پاک نبی سرکاراں

سوہنے رب نے گھلایا ایہ دستور حیاتی والا
عملاں تھیں پاکیزہ کردا رکھدا وچ حصاراں

آل نبی ، اصحاب نبی دی عزت آور دے
سوہنے پاک صحیفے رکھیاں ایہناں سر دستاراں

.....☆.....☆.....

آل پیاری پاک نبی دی

پاک نبی دی آل دے اُتوں اپنا تن من واراں
ایہناں اچیاں جاناں لئی میں مدحت ہار کھلاراں

پاک نبی دی آل نے سچ دی حرمت شان ودھائی
پاک نبی دی آل نے ڈھائیاں جھوٹھ دیاں دیواراں

پاک نبی دی آل پیاری اُچیاں شاناں والی
پاک نبی دی آل دا ناواں اچا وچ درباراں

جاناں وار کے آل نبی نے دین دی راکھی کیتی
ایہناں اُچیاں جاناں لئی میں سبھے باغ بہاراں

صدقے ایہناں اچیاں توں میں واری واری جاواں
جہاں اپنی ہک تے ڈکیاں جھوٹھ دیاں یلغاراں

پنچتن پاک دی مدحت کر کے پندیاں دل وچ ٹھنڈاں
پنچتن پاک دی مدحت کر کے اپنا سینہ ٹھاراں

ایہناں دا ای نور اے سارا رکھدے شان مثالی
ایہ جنت دے وارث سارے ایہناں سر دستاراں

خشبوواں دے ہلے آؤن ناں سوہنے جد چپے
ایہناں سوہنے ناواں نال ای مہکیاں سبھ گلزاراں

آل نبی دی مدحت کریئے آقا وی بخش ہوندے
بخش وڈے کملی کالی نالے نور انواراں

ذکر صحابہ پاک دا کریئے لذت ملے نرالی
ایہناں سوہنیاں ہستیاں وڈیاں سبھ پاسے مہکاراں

.....☆.....☆.....

اصحاب رسولؐ

صدیقؓ، عمرؓ، عثمانؓ، علیؓ جیسے سوہن سنکھڑے یاراں
سوہنے دین بچے اندر کیتیاں خوب بہاراں

چارے یار نبیؐ دے پیارے، چارے نور منارے
چارے مہر وفا دے سورج رکھدے اُچ دستاراں

پاک ملائک ایہناں دے لئی نت دعاواں کردے
پیار سلاماں پیش چہ کیتیاں سوہنے نور اسواراں

ایہناں دے ای نور تھیں ہويا روشن آل دوالا
سبھ تھیں لطف عطاواں وٹیاں سوہنے نقش نگاراں

چاروں اُچے رتبے والے 'چاروں نور دے چشمے
چاروں پاک نبی دے عاشق رہندے وچ گلزاراں

باقی وی اصحاب نبی دے روشن روشن تارے
جہاں دے ایمان تھیں ہوئیاں روشن سبھے باراں

وچ غلامی ایہناں دی بس جیون اسیں بتائیے
ایہناں نال محبت کریئے چمکن دل دیاں تاراں

ایہناں پاک نفوساں توں اے رب وی راضی ہویا
ایہناں وچ ای ونڈیاں سوہنے سوہنیاں سبھ دستاراں

پاک اصحاب دی خدمت دے وچ لکھاں ہار سلاماں
جہاں دیاں فکراں تائیں کھڑیاں ایہ گلزاراں

ایہناں سوہنیاں تکیا آپؐ نوں آپؐ دے نیڑے بہہ کے
ایہناں دے نیں دل چکائے پاک نبیؐ سرکاراں

ایہ نیں پاک پوتر سارے پاک نبیؐ دے ساتھی
ایہناں اُتے نور نبیؐ نے پایاں نیں چکاراں

چاہت والے جام چہ پی کے مہکاں دندے پئے نیں
آقاؐ ایہناں تائیں رکھیا اپنے وچ دلداراں

ایہ نیں جھھاں واریا سبھ کجھ اپنا پاک نبیؐ توں
پاک نبیؐ دی ڈھال بنے جو جھھاں کھادیاں ماراں

سارے سوہنیاں شانناں والے، سارے افضل اعلیٰ
سارے خوب مثالی رکھدے اپنیاں طور اطواراں

ایہناں وچ کجھ خاص الخاص نیں رتے ناتے ولوں
 کیتا دین اسلام نوں اُچا ایہناں ای جی داراں

ایہو عاشق صادق لوک نیں روشن چن تے تارے
 ونڈی لاٹ محبت والی ایہناں نور میناراں

ایہ سبھ آپ دی صحبت بیٹھے آپ نوں رج رج تکیا
 چمیا آپ دا جسم مبارک ، سنیاں نیں گفتاراں



آپؐ دیاں گفتاراں

موتیاں وانگوں چمکن آقاؐ آپؐ دیاں گفتاراں
علم خزانے وٹن آقاؐ آپؐ دیاں گفتاراں

مہر محبت پیار اخلاق دے پھلاں نال ایہ سجیاں
نُشیواں تھیں مہکن آقاؐ آپؐ دیاں گفتاراں


جاناں دے لئی راحت نیں تے ایماناں دا حاصل
شاد دلاں نوں رکھن آقاؐ آپؐ دیاں گفتاراں

ایہ نیں ہر اک روگ دا چارہ ساڈا نیت سہارا
تن من کردیاں روشن آقاؐ آپؐ دیاں گفتاراں

ڈلھکاں مارن ایہناں دے وچ رنگ حیاتی والے
پیار دا کھڑیا گلشن آقا آپ دیاں گفتاراں

سچائی دیاں مہراں لایاں آپ نے ایہناں اُتے
اس دنیا لئی چائن آقا آپ دیاں گفتاراں

ہر اک دور انج ایہ تے ڈہنیاں تازہ پھلاں وانگوں
نویاں ہر دم لگن آقا آپ دیاں گفتاراں



حدیث نبوی ﷺ

ترجمہ

سوہنی نیت عملاں تائیں دیوے نور بہاراں
نیت نیہ نوں پکیاں کر کے عمل دا محل اساراں

ڈھال بنے گا روزہ تیرے ہور گناہاں اگے
روکے شر شیطان دیاں ایہ ہودن جو یلغاراں

نہ اوہ تیرے مال نوں دیکھے نہ اوہ تنکے صورت
جھاتی مارے عملاں دتے دیکھے دل دیاں باراں

شکر گزار نہیں لوکاں دا جو کوجھا اے اوہ بندہ
رب دا کیویں شکر گزارے وٹے کنج انواراں

چاہو جو کچھ اپنے لئی اوہ دوجیاں لئی وی چاہو
پکا انج ایمان اے ہوندا کھڑیاں نیں گلزاراں

نکیاں اُتے رحم نہ کردا وڈیاں دی نہ عزت
اوہ نہیں ساڈے وچوں آکھیا پاک نبی سرکاراں

ایماناں دا حصہ جے ایہ نور حیا دا سوہنا
جے کر ہووے ایہ اکھیاں وچ پھٹدیاں نور پھہاراں

بوہتا ہسنا قلب نوں مردہ کر دیندا اے تدا ای
سوہنے آقا آکھیا دل نوں رکھو وچ حصاراں

غصے اُتے قابو پائیے نور ایمانی ودھدا
غصہ جے کر نہ کریئے تے نعمتاں ملن ہزاراں

نور امانت، وڈی دولت دل نوں شاہی دیندی
جہڑا اس دی راکھی کردا پاوے شان وقاراں

نفس تے قابو جنھے پایا اوہ ای طاقت والا
دشمن کولوں چت نہ ہووے رکھدا ہتھ مہاراں

نرم سبھا جو رکھدا جہڑا کھلے متھے ملدا
اوہو رب دا پیارا اوہدے سر پھبن دستاراں

نیک والی راہے پانا نیک عمل اے سوہنا
رب توں منگاں توفیقاں میں اپنی ذات نکھاراں

بھیڑے کم نوں اسیں مٹائیے چنگے کم ول لگ کے
چنگی صحبت رکھیے کریے چنگیاں سوچ وچاراں

تیکے کتے برائی اوہنوں طاقت نال چہ ڈکیے
انج نہ ہووے بھیڑا کہہ کے کریئے استغفاراں

جہڑا دوجے لوکاں دا اے اتھے عیب لکاندا
سوہنا رب وی بخشے اوہنوں دیوے پیار اتباراں

جہاں دا اخلاق اے چنگا اوہ ای لوک نیں چنگے
عزت، عظمت اوہ ای پاندے ہوندے وچ اُچیاراں

دین مکمل، اللہ اک تے، پاک رسول نوں متاں
صوم و صلاتاں سدھیاں رکھاں جج زکوٰۃ گزاراں

مال اسباب نہیں رکھدا بھاویں نور غنا جو رکھدا
اوہ اے اصل توں گبر رکھو اوہدے سر دستاراں

قرضہ لینا وڈی لعنت عیب اے دنیا داری
دیندا اے رسوائیاں نالے رکھدا وچ بیماراں

رشوت لینا ، رشوت دینا دوویں ناری کم نیں
لعنت والا کم اے لہنوں پھڑیا اے بدکاراں

اک دوجے تھیں تحفے دیئے پیار محبت ودھدی
کینے دور نیں ہوندے اس تھیں نکھرن فکر افکاراں

خدمت جہڑا قوم دی کردا اوہ سردار اے اصلوں
پیار محبت سو بھا پائی قوم دے خدمت گاراں

سائل تائیں نیکی کرنا صدقہ ای اکھوائے
مندا کدی نہ بولو اُس تھیں نرم کرو گفتاراں

افضل اوہ انساناں وچوں جو قرآن دا طالب
 سینے لائے نالے ونڈے اس دیاں نور افکاراں

جیویں کھاندی اگ لکڑی نوں انج حسد اے کھاندا
 نیکیاں تائیں ساڑ کے رکھیا ایہدے شر اثراراں

جہڑا اپنی ذات نوں اٹھے عجز مقام اے دیندا
 سوہنا رب ہمیشہ دیوے عزت دیاں دستاراں

رحم کرے نہ جو دوہجے تے رحم کدے نہ پاوے
 اوہدے کیلےں دور ای رہندیاں رحمت والیاں دھاراں

پیار، محبت اتے عداوت رب دے لئی جو رکھدا
 اوہ اے اپنے عملاں والا رہندا وچ مداراں

مومن دے لئی بندی خانہ کافر دے لئی جنت
ایہ دنیا تے ایہدیاں ظاہری سبھے باغ بہاراں

موت نصیحت کافی اے بس عبرت دے لئی اتھے
موت نوں جہڑا یاد اے رکھدا رہندا وچ بیداراں

پیار سلام نوں عام چہ کرنا سوہنی پیاری عادت
امن امان اچ رکھے سبھ نوں ونڈے پھل مہکاراں

تد ہوندا ایمان مکمل جے کر آپ جو چاہوو
اوہو ونڈو ونڈن لکیاں اندر غیراں یاراں

اپنے کول قناعت والی دولت رکھدا جہڑا
اودھا مال کدے نہیں کدا وانگوں دنیا داراں

سچ نیکی دے پھل کھڑا جنت دل لے جاندا
سچ اے سوہنا سوہن سنگھڑا رکھدا نور انواراں

اوہ نہیں ساڈے وچوں جہڑا دھوکھا دیون والا
آکھیا اپنی اُمت تائیں پاک نبی سرکاراں

حرص امیداں ودھدیاں جاون بندہ بڈھا ہووے
اوہ دھوکھا نہیں کھاندا جہڑا کردا استغفاراں

شرک نہ کرنا بھاویں تہاڈا جسم جلایا جاوے
بوٹیاں نوچن بھاویں کافر دیون دکھ ہزاراں

جس دے ہتھوں اتے زبانون رہن سلامت مسلم
اوہو ای نیں مسلم جہڑے وٹن چین قراراں

اک سوراخوں دو داری تے مومن ڈنگ نہیں کھاندا
اوہدے کول اے علم تے حکمت اوہ نہیں وچ گنواراں

ماواں دے قدماں دے تھلے رب نے جنت رکھی
سوہنا تاج سعادت پایا ماں دے خدمت گاراں

زہر اچ بجھے تیر شیطان نے رکھے کول میں جھڑے
بد نظری دیاں اوہناں وچ ای ہندیاں ہین شماراں

بجل تے بداخلاقی کٹھیاں مومن وچ نہیں ہندیاں
مومن دی نہیں شان کہ اُس تے چلن ایہ پُرکاراں

آپ دیاں سوہنیاں گلاں والے علم خزانے ونڈ کے
آپ دے سوہنے ناں جپاں تے پاواں چین قراراں

.....☆.....☆.....

سوہنے نام نبیؐ دے سارے

سوہنا نام محمد ﷺ پیارا جہدیاں سبھ جھلکاراں
عرشاں فرشاں اندر ویکھیاں ایہدیاں نوری دھاراں

آپؐ دا ناں اے احمدؐ پیارا سوہنیاں جہدیاں دکھاں
ایہنوں ساہویں رکھ کئے سوہنی رب دی حمد چتاراں

آپؐ دا ناں اے حامدؐ سوہنا اُج تعریفاں والا
سوہن سنکھنے میں اس ناں تھیں اپنی ذات نکھاراں

آپؐ دا ناں محمودؐ اے اُچا اُچیاں شاناں والا
اُچے سچے میں اس ناں تھیں اپنے بخت سنواراں

آپؐ دا ناں اے قاسمؐ پیارا نعمتاں وٹن والا
دامن بھرلاں ایہدے صدقے پاواں نور مہہاراں

آپ دا ناں مختار وی سوہنا جس دے ہتھ خزانے
جہڑا ونڈے سارے جگ تے پیار دیاں مہکاراں

آپ دا پیارا نام اے فاتح جس دے نال نیں جتاں
جہڑا حق دا داعی ، روکے کفر دیاں یلغاراں

آپ دا ناں اے شاہد سوہنا نور گواہی ونڈدا
جس دی برکت رحمت نال نیں سجیاں پیار بہاراں

آپ دا پیارا نام اے حاشر سوہنا نور منارا
جنہوں من کے احد احد آکھیا اوگن ہاراں

آپ دا ناں مشہود اے اُچّا جس دا ہر تھاں جلوہ
جہدیاں پاک ملائک صدیاں تكدے رہے انواراں

آپؑ دا نام رشیدؑ اے سوہنا جہڑا سبھ دا ہادی
نھیریاں وچوں کڈھ کے جھنّے دیتاں نور افکاراں

آپؑ دا نام بشیرؑ وی لکھیا دیندا جو خوش خبراں
جس تھیں کھلریاں نیں تنویراں کردا روشن باراں

آپؑ دا نام نذیرؑ ویؑ سوہنا باطل دی حد دے
ذہناں نوں بیداری دیوے رکھے دور اشتراں

داعؑ بن کے دعوتِ دِقی آپؑ نے شام سویرے
داعی بن کے حق دے حق وچ کیتیاں نیں گفتاراں

شافؑ بن کے آپؑ نے ہر اک درد دا چارہ کیتا
روحاں دا درمان چہ کیتا ونڈیاں نوری دھاراں

اِطْحٰی اسم مبارک سوہنا بطحا شہر دی نسبت
جھتے سچ نوں جتاں ملیاں جھوٹھ نوں ملیاں ہاراں

ہاؤ اسم مبارک آپ دا ونڈے نور ہدایت
جہل دے پنجرے توڑے جھتے دتیاں پیار پکاراں

مہدیٰ پیارا نام نبی دا گمراہی نوں کٹے
جیون پیار سوغاتاں ونڈے اپنے وچ دلداراں

مہدیٰ سوہنا نام آقا دا نہیرے مار مکاوے
ایہدے تائیں دل وچ اترن نور دیاں چکاراں

ماہج دیاں لاٹاں کردیاں باماں تائیں روشن
ایہناں روشن باماں تائیں اپنا دھن من واراں

منجِ آکھ کے پاک نبیؐ نوں سوہنا سرور مٹھیا
سوہنے سرور آقاؐ دتیاں سبھ نوں شان وقاراں

ناہِ سوہنا نام نبیؐ دا صدق صفا سرناواں
سبھناں دے دل دھوتے اس تھیں پاک نبیؐ سرکاراں

آپؐ رسولؐ خدا دے سوچنے خوبیاں نال بھرے نیں
ہستی آپؐ دی پھل پرچی اُچی وچ گلزاراں

سوہنا پاک نبیؐ اے آپؐ دا سوہنا سوہنا ناواں
سبھناں تائیں خوب رجایا آپؐ دے نقش نگاراں

اُمیؐ آپؐ نوں رکھیا سارے دتے علم خزانے
آپؐ معلمؐ ، ہادیؐ ، رہبرؐ آپؐ دے ہتھ مہاراں

آپؐ تہامیؑ حسب نسب وچ آپؐ نہیں سبھ توں اعلیٰ
آپؐ نہیں شان تے شوکت والے آپؐ دے سردستاراں

ہاشمیؑ آپؐ دا لقب اے پیارا دوئیں جہانیں اُچّا
نقش مبارک آپؐ دے سوہنے چمے نور اسواراں

آپؐ عزیزؑ نہیں سبھناں دے لئی شان بزرگی والے
اُمت دے رکھوالے آپؐ نہیں سبھ دیاں لیندے ساراں

طہؑ سوہنا نام اے پیارا ونڈ دا نور نظارے
پاک مبارک ناں ایہ جپاں اپنا سینہ ٹھاراں

آپؐ رؤفؑ رحیمؑ نہیں آقاؑ رحمت بن کے آئے
آپؐ دی رحمت رافت رکھے سانوں وچ حصاراں

آپؐ حریصؑ نیں اُمت دے لئی منکدے بخشش رحمت
ایسے پیار دے چشمے کول میں اپنی عمر گزاراں

آپؐ دا پیارا ناں فتاحؑ اے جو دروازے کھولے
پیار دی مشعلؑ بالے جہڑا ونڈے سوچ وچاراں

آپؐ نے مصباحؑ بن کہ جگ وچ جگمگ جگمگ کیتا
اوہو روشن ہويا جنھوں ملیاں نور انواراں

آپؐ حجازیؑ سوئی نسبت سانوں لگے پیاری
آپؐ دی حکمتؑ آپؐ دی چاہت ونڈے پیار ابتاراں

آپؐ امرؑ نیں سوہنے رب دے آپؐ نقیبؑ وی سوہنے
بنے خطیبؑ تے خوب ہلایاں ستیاں دل دیاں تاراں

آپؑ نیں عجمیؑ آپؑ نیں عربیؑ آپؑ نیں کمی مدنیؑ
مائل کیتا خوب دلاں نوں آپؑ دے ذکر اذکاراں

ناطقؑ بن کے سبھناں تھیں قرآن دی دولت ونڈی
نال خوشی دے جھولی پائے ایہ مہل نیکو کاراں

حافظؑ آپؑ دا ناں اے کردا سبھناں دی نگرانی
لطف حیاتی والا ونڈدا اپنے وچ پیاراں

عالمؑ پیارا نام آقاؑ دا دے بھید حیاتی
پاندا سوہنا دل دل جھاتی ونڈدا سخن ہزاراں

واعظؑ بن کے آپؑ نے آقاؑ نور افشانی کیتی
سوہنا نور پچھاتیا ناہیں ازلاں دے گنواراں

آپؐ دا پیارا نام فصیحؐ اے خوب فصاحت بھریا
آپؐ دیاں پاک اداواں اُتے اپنی جان نثاراں

آپؐ نیں اولیٰؐ ، اعلیٰؐ ایسے مثل مثال نہ جس دی
نور اچ ڈھلی ذات مبارک سبھ دیاں لیندی ساراں

آپؐ ترازىؐ ، آپؐ قریشیؐ ، آپؐ حجازیؐ ، آقاؐ
آپؐ دا نام ای دنیا اندر اُچا وچ درباراں

آپؐ مبلغؐ ، مومن کاملؐ ، واعظؐ ، صادقؐ ، سید علیؑ
آپؐ مکرمؐ ، آپؐ مبشرؐ ، صاحبؐ وچ سرداراں

آپؐ منیبؐ نیں آپؐ حبیبؐ نیں آپؐ نیں ناطق عالمؐ
خیرانام اے آپؐ دی ذات ای ونڈے جو دستاراں

آپؐ دا سوہنا نام شفیعؑ اے نور شفاعت و نڈ دا
بخشش دا سرچشمہ آپؐ نیں خوشیاں دین ہزاراں

سوہنے نوں منصورؑ بنا کے شانناں رب ودھائیاں
رفعت، عظمت آپؐ نے و نڈ کے پائیاں ٹھنڈاں ٹھاراں

ناصرؑ بن کے آپؐ آئے تے طے دل سبھ جوڑے
ظلمت دے وچ گھریاں پائیاں نور دیاں جھلکاراں

سوہنے نے مصدقؑ بن کے باطل آن مٹایا
پیار صفائیاں آکروائیاں شرک دیاں بیماراں

آپؐ مصدقؑ بن کے آئے سچ نوں عام چہ کیتا
ڈکیا بھادیں آپؐ نوں تھیں تھیں جھوٹھ دے ٹرل مناراں

ختم الرسل، مولائے کل، آپ دی ذات گرامی
خیر بشر تے خیر ورأتے اپنا تن من واراں

آپ حبیب لیب خدا دے ڈیرہ پاک مدینے
ونڈ دے پئے نیں نور خزینے جس دیاں نہیں مقداراں

آپ صفی نیں نور صفہ دے چشمے اُتے بیٹھے
رج رج پیندے جہڑے جاندے روشن پاک دیاراں

آپ ولی نیں ایسے جہڑے سبھ دی راکھی کردے
اپنے اک اک اُمتی تائیں رکھدے وچ شماراں

سوہنا نام حبیب اے آقا آپ دا پیارا پیارا
جہدیاں لپکاں جھولی پایاں آپ دے خدمت گاراں

نام شکور اے آپ دا سوہنا سیرت دا لشکارا
جنھوں سامنے رکھ کے کردی دنیا ہار شنگھاراں

خاتم بن کے آپ آئے تے وٹے حرف ہدایت
نور خدا جس جھولی پایا ہویا وچ اچیاراں

ذات قوی بس پاک نبی دی قول عمل وچ دیکھی
ہر اوکڑ ہر مشکل دے وچ پڑھیاں استغفاراں

سوہنا نام ہی آقا دا کرے حفاظت سونی
اپنی وچ حفاظت رکھے دور کرے خرکاراں

سوہنے آقا آپ غنی نہیں سبھ دے دامن بھر دے
آپ دے درتوں دولت پائی دنیا دے زرداراں

سوہنا نام مبین آقا دا نقش یقین اگیڑے
آکھے ڈور نفس دی کچھو اڈو بن بن ڈاراں

آپؑ مبلغؑ بن کے آئے ونڈیاں پیار بہاراں
آپؑ نے خوب پلایاں آکھے نوری ددھ دیاں دھاراں

حق لئی حجتؑ بن کے آئے آقا دنیا اندر
ٹھلہا بیڑا توحیدی لے نور دیاں پتواراں

آپؑ دا نان برہانؑ اے سوہنا سچ نتارے جہدا
نال دلیلاں نقش جمائے جنھے وچ مداراں

مومنؑ آپؑ دا نام اے پیارا مثل مثال بنایا
جہدیاں سارے جگ تے ونڈیاں سوہنے رب مہکاراں

رب نے پیار دے ناں نال سدیا آپؑ نوں مدنی ماہیؑ
 آپؑ دی سوہنی ذات اے اُچی اوہدے وچ شہکاراں

آپؑ منیبؑ نیں سوہنے آقاؑ خوب دلاں نوں دھوندے
 میں وی پیار پیری بوواں غفلت خول اُتاراں

کاملؑ سوہنا ناں آقاؑ دا حسن صفاتاں ونڈے
 روشن چن چراغؑ چہ کیٹے آپؑ نے لکھ ہزاراں

آپؑ نیں آخرؑ آپؑ نیں اوّلؑ آپؑ نیں رہبرؑ ہادیؑ
 چلی انج منادی آپؑ دی جیوں چلن پرکاراں

آپؑ امینؑ امانت والے اُج معیار نیں رکھدے
 حسن امانت آپؑ توں سکھیا دنیا دے سچاراں

ناں عبداللہؑ آپؑ دا سوہنا جگمگ جگمگ کردا
ایسے نال تھیں روشن ہوئیاں جگ دیاں سبھے باراں

آپؑ کلیمؑ نین ایسے جا کے عرش تے گلاں کردے
آپؑ بشر دے جاے اندرؑ اودھر نور انواراں

سوہنا نام مطہرؑ اے آپؑ دا رب دی شان دا مظہر
جھنے پاک حبیبؑ دے تائیں دتیاں نین دیداراں

ظاہرؑ سوہنا نام وی پیارا شان وقار ودھاندا
دھرتی اے یا عرش بلندی ایہدیاں ای چکاراں

باطنؑ ایسا نام اے پیارا ہر تفسیروں اُچا
ایہدا ذکر مبارک کریئے ملدیاں باغ بہاراں

آخرُ پیارا نامِ نبیؐ دا اچیاں شاناں والا
محشر دے وچ ایسے ناں دے ہونیاں ہتھ مہاراں

اولُ سوہنا نامِ نبیؐ دا بعدِ خدا دے آؤندا
دنیا اُتے حشراں توڑی ایہدیاں ای مہکاراں

آپؐ یتیمؑ اکھوائے نیں پر سبھناں اُتے سایا
ویکھیا ساری دنیا نے تے نالے لیل نہاراں

نامِ حکیمؑ نبیؐ دا بھارا حکمت جہڑا ونڈے
کر نہیں سکدیاں کدے احاطہ ایہدا ایہ البصاراں

آپؐ کریمؑ ، عظیمؑ ، نبیؐ نیں کرم کماون والے
آپؐ دی مہرِ محبت نال ای وسن دل دیاں باراں

آپؐ سراجؑ منور بن کے اس دنیا تے آئے
آپؐ دے نور توں رشاں لیاں سمھناں لالہ زاراں

ذات اے محرمؐ آپؐ دی سوہنی دور کرے گمراہیاں
آپؐ توں بھکھیا عشق دی لئی اے عشق دیاں سالاراں

آپؐ محللؑ راحت و نڈنؑ فیض اے آپؐ دا جاری
آپؐ دے لطف دا صدقہ رہندی دنیا وچ خماراں

آپؐ مبشرؑ بن کے آئے وندیاں عشق سچائیاں
آپؐ دی مہر محبت پائی پھلاں ، کلیاں ، خاراں

آپؐ مذکرؑ ، ناصحؑ ، مشفقؑ سوہنی گل بھاون
وجداناں تھیں بخشیاں آپؐ نے فکراں تے افکاراں

سوہنا نام خلیلِ نبیٰ دا پاک خلیل دی نسلوں
وصل ربانی پایا آپ دے سوہنے رشتہ داراں

نام جواد اے آپ دا سوہنا جود سخا دا چشمہ
نور سبحانی وٹڈے سبھ وچ اپنے نال معیاراں

عادل آپ دی ذات اے پیاری عدل کماون والی
لطف دے پھل ورتاوے سبھ وچ بخشے چین قراراں

پاک رسول ملائم کردے نرم مزاجاں تائیں
جہڑے آپ دی صحبت بیٹھے بھل گئے سبھ تکراراں

آپ نیں آقا سید صاحب سارے وچ جہاناں
دل شیشے چکائے آپ نے بہہ کے نور دیاراں

رحمتِ عالم اُتے بتوں ورسائیں مَہل ایہ سوہنے
صل اللہ میں آکھاں مولا لکھ کروڑاں داراں

آپ دا ناں اے عاقب اُچا آخرتے جو آیا
اکل دین دی نعمت کیتی واسطے دنیا داراں

آپ مبلغ بن کے آئے ونڈیاں آن بہاراں
آپ نے خوب پلایاں اتھے نوری دُده دیاں دھاراں

آپ دا ناں یسین مبارک شان نرالی رکھدا
ایہ دے سایا پاک نبی دا اُتے دنیا داراں

آپ منزل آپ مدثر صدق امام نیں آقا
آپ دا تقویٰ زہد عبادت رنگ بہار نگاراں

آپؑ دا پیارا نام اے طاہرؑ سوہنا تے پاکیزہ
راحت کیف دوامی دیوے بن کے چھاں چھتئاراں

آپؑ دا سوہنا نام اے طیبؑ پاک پوترؑ کردا
منظر اجلے اجلے کردا رکھدا وچ بیداراں

آپؑ دا سوہنا نام مدرؑ کملی والے آقاؑ
آپؑ دی اُمیؑ شان دیاں نیں ایہدے وچ اظہاراں

آپؑ دا نام متینؑ اے آقاؑ مے توحیدی وٹدے
نھیریاں اندر چانن وٹدے وانگ مشعل برداراں

مصبحؑ آپؑ دا نام ہے پیارا جس تھیں دنیا روشن
دل شیشے اس صاف چہ کیے لاہیاں دھوڑ غباراں

آپُ دی سوئی ذات اے حجۃؑ سمھناں دے لئی آقاؑ
غفلت تائیں دور نساوے رکھے وچ ہشیاراں

ساڈے لئی انعام نیں آقاؑ آپُ دے ناں ایہ سوہنے
ایہناں تائیں عشق جے کرے کھڑدیاں فرگزاراں

آپُ دے سارے ناں میں آقاؑ سوہنے نور وظیفے
آپُ دے بارے جہڑا سوچے ہووے گم اسراراں

آپُ دے ہتھ تے ہتھ اوہ رکھ کے آکھے ہتھ ایہ میرا
اپنے کول بلاوے آپُ نوں بھیجے برق اسواراں

آپُ اعجاز سراپا آقاؑ آپُ دے وانگوں کہدا
آپُ نوں مولا آپُ کھلاوے، رکھے وچ حصاراں

ﷺ

.....☆.....☆.....

معجزات

آپؐ آئے تے چارے پاسے کھڑ پیاں گلزاراں
آپؐ دی رحمت برکت دے نال ہوئیاں نور انواراں

آپؐ دی نظر سولی پاروں دور ہوئے غم سبھ دے
آپؐ دے آیاں میرے آقا روشن ہوئیاں باراں

ورق ورق قرآن دا آقاؐ دی عظمت دے
آپؐ دیاں تعریفاں کیتیاں دشمن وی سرکاراں

چشمے اُبلے ، پتھر بولے ، جن ہويا دو ٹوٹے
آپؐ دے آیاں رُک سکیاں سبھ کفر دیاں یلغاراں

آپؑ نے ہتھ ہلایا تے فر سورج پرت چہ آیا
رب نے دتیاں ویلے دیاں آپؑ دے ہتھ مہاراں

وچ پنکھوڑے چن کھڈونا کھیڈن دے لئی ملیا
ویکھ کے اوہ وی بخش ہوندا سی آپؑ دیاں جھلکاراں

کفر دی اگ وچ سڑھے جتے اپنے پیار تھیں تھارے
لطف دا مینہ ورسایا سبھ تے آپؑ دے نور افکاراں

اس دنیا نوں ہر اک نعمت آپؑ دے صدقے لہی
سوہنے نور نے جھاتی پائی ویاں نور مہہاراں

آپؑ دا حکم صحابی نے جد رکھ نوں جا کے دتا
آپؑ دی خدمت دے وچ آیا وانگوں خدمت گاراں

بند مٹھی وچ کنکر لے کے کافر سی جد آیا
کلمہ پڑھ کے کنکراں دسیاں آپ دیاں شان وقاراں

ہجر نبی دے اندر رویا سکا رُکھ حنانہ
دور ہوئیاں جد اوہدے کولوں نوری ٹھنڈاں ٹھاراں

سوہنے نوں معراج کرایا رب نے کول بلا کے
سیر کرائی عرشاں دی تے بخشیاں نور انواراں

کیہ کیہ گلاں کیتیاں ہونیاں رب نے کول بلا کے
ایہ پردہ اے اس پردے چوں جھاتی پان بہاراں

معجزیاں تھیں بھریا سارا آپ دا حسن سراپا
رب نیں جھدیاں کھا کھا قسماں کیتیاں نیں گفتاراں

.....☆.....☆.....

سراپا مبارک

جان توں پیارا ، نور دا پیکر ، ونڈدا نور انواراں
ساڈے سبھ دے دل دا محور لیندا ساڈیاں ساراں

جس دی دیدنوں پل پل تہ سے آپ دا ہر اک بردہ
سوہنا مکھڑا ، پاک معطر ، دیوے نت بہاراں

سُتے بھاگ جگاون والا ، اس اُمت دا والی
پیار دا مظہر ، نور مبشر ، سوہنا وچ گلزاراں

مُھل رحمت دے ونڈدا جہڑا ، سبھ نوں راحت دیندا
مُشفق ، داعی ، شافع محشر رکھدا وچ حصاراں

چین دلاں دا بن کے آیا ساڈا ملجا ماوی
 محسن ، ہادی ، مہر منور ، دیندا شان وقاراں

خلق دی خشبو ، نال معطر جس دنیا نوں کیتا
 شان منزل ، شان مدثر ، جس دے ہتھ مہاراں

ساڈا سبھ دا سچا ہادی ، مکی ، مدنی ، ماہی
 خاتم بعثت ، اکمل رہبر ، اچا وچ سرداراں

جس دے ہتھ اے سبھ مختاری ، جس دی صورت پیاری
 روشن مکھڑا ، برتر بہتر ، بخشے ہن دیداراں

حسن سراپا جس دا اعلیٰ ، سوہنا اچیاں شانناں والا
 نبیاں دا سرتاج مبشر ، وٹڈا جو دستاراں

حسن سراپا آپؑ دا سوہنا ونڈدا نور پھہاراں
 حسن سراپا آپؑ دا سوہنا دیندا چھین قراراں

حسن سراپا آپؑ دا لکھے کس دی ایسی طاقت
 حسن سراپا جہاں تکیا پے گئے سوچ وچاراں

ویکھن والیاں ویکھ کے آپؑ نوں کجھ گوڑ نیں لائے
 کجھ اٹھائے نقش نگینے ونڈیاں کجھ مہکاراں

اوہناں دے ای کہن مطابق میں کجھ موتی چک کے
 حسن سراپا آپؑ دا لکھ کے پاواں شان وقاراں

سوہنے رب نے وچ صحائف نقشے لیکے نوری
 وچ صحائف نوری لیاں نبیاں تھیں اقراراں

آپُ دی ذات صفات دے سورج رب نے روشن کیتے
 آپُ دے آن توں پہلاں جگ وچ پیاں پیار پکاراں

پاک محبوبُ دی شان دے ڈنکے رب نے خوب وجائے
 سبھ پاسے اعلان چہ ہويا آؤنا چن سرکاراں

سوہنا اوہ محبوبُ اے پیارا جس دا کوئی نہ ثانی
 رب نے رحمت آکھ کے دتیاں اوہدے ہتھ مہاراں

ازلی نور تے بشری جامہ آپُ دی پک نشانی
 جس دا سوہنا نام جے چپے خوشیاں ملن ہزاراں

آپُ دے نور دی گل نہیں چھوئی اوہدیاں وکھریاں شاناں
 بشری جامے دی گل کر کے اپنے بخت سنواراں

رنگ سفید سی سرخی مائل صاف تے روشن سوہنا
قد میانہ قامت کھڑدی رکھدی شان وقاراں

نوری مکھڑا پیارا پیارا دل وچ کھین والا
جے کر اوہنوں دیکھ لواں تے اپنی جان میں ہاراں

چن سورج دے کولوں آقا آپ دا روپ سوایا
اس دھرتی توں عرشاں توڑی آپ دیاں جھلکاراں

گنڈلاں دانے نہ انی سدھے گیسو پیارے پیارے
رب جہاں دیاں قسماں کھاوے جہاں نال بہاراں

سر سرداراں ورگا وڈا خوب سی سبھ نوں بھاندا
پاک عمامہ رکھیاں جس تے دیندا سی چکاراں

شانیاں دے وچکار سی آپؑ دے مہر نبوت والی
جنہوں ودھ ودھ چمیا آپؑ دے سمھناں ای دلداراں

متھا آپؑ دا روشن روشن لاٹاں دیون والا
جیہدے نور دے نال ای ہوئیاں ہر پاسے انواراں

بھنواں دراز باریک سی دودیں آپس دے وچ ملیاں
اکھیاں لئی ایہ تاج نورانی کردا ہار شنگھاراں

صدقے سوہنیاں اکھیاں اُتوں واری دنیا ساری
نور حقیقی جہاں اکھیاں تکیا وانگ بیداراں

دند مبارک آپؑ دے سوہنے سچے موتیاں ورگے
جہاں دیاں سن جگمگ کردیاں ہر پاسے چمکاراں

کلیاں وانگوں کھڑیا ہاسہ خوب متانت بھریا
جس دی بھکھیا منکن ٹریاں سھے باغ بہاراں

پاک زبانوں نکلیاں گلاں آئیاں وچ تحریاں
اوہ نیں جی الہی یا فر نور و نور افکاراں

پاک لعاب دہن سی آپ دا دکھ دا دارو کردا
کھارے کھوہ جس مٹھے کیتے کئے روگ بیماراں

آپ نوں بخشی پاک سماعت اُچیاں شاناں والی
دھرتی تے اسمان سی سھے آپ دے وچ حصاراں

ہتھ محبت وڈن والے دل وچ ٹھنڈاں پاندے
جتھے جتھے دی مس ہوئے کھڑیاں نیں گلزاراں


سوہنیاں سوہنیاں اُنکلاں وچوں نہراں آپ چلائیَاں
ایہناں وچوں نکلیاں پل پل رحمت والیاں دھاراں

آپ دے وضو مبارک توں وی جھڑا پانی لتھیا
اوہنوں اپنے جسم تے ملیا آپ دے جان ٹاراں

سوہنی ٹور مبارک آپ دی اُچیاں شانناں والی
عرش مکانے حد اے جس دی ہوئیاں دور مداراں

آپ دا روپ سراپا سارا معجزیاں تھیں بھریا
جس دے تائیں جھاتی ماریئے چمکن دل دیاں تاراں

آپ دا روپ جمال الیک کے رب نے قلم چہ دھریا
کن کہہ کے جد فارغ ہوا رُجھ گیا وچ دیداراں



دید دی تانگھ

اسیں آں آپ دی دید دے بھکھے منگیے نت دیداراں
آقا ساڈا لکھ لئو ناداں اپنے وچ دلداراں

دل دی آس ایہ پوری ہووے آقا کرم کماؤ
نوری جلوہ نظر بے مآوے اپنا سینہ ٹھاراں

میں اوہ پیارے لمحے اج وی دل وچ سانجھ کے بیٹھا
جد اوہ سوہنیاں مکی مدنی ملیاں سی انواراں

بھاگ مرے جے چمکن تے فر نوری شہر اوہ نکال
جتھے آقا پاک دی خشبو رچی وچ گلزاراں

مکہ پاک دے پاک نظارے کسراں میں بھل سکدا
جتھے آقا سوہنے دیاں تھان تھان نیں مہکاراں

.....☆.....☆.....

مکہ پاک

مکہ پاک اے شہر ادہ سوہنا جتھے پیار بہاراں
جتھوں دا اے ذرہ ذرہ گھنیا وچ انواراں

ابراہیم خلیل اللہ دا خاص مقام اے اتھے
نار اچ سٹیا جھاں تائیں کھڑ پیاں گلزاراں

اسمعیل ذبیح اللہ دا چلدا نام اے اتھے
جھاں خوب چلائیاں اپنے عشق دیاں پرکاراں

”زم زم“ والا اس دھرتی تے ملدا زندہ پانی
جہڑا نت شفاواں ونڈے رکھے وچ حصاراں

”صفا تے مروہ“ مولا پاک دی اتھے خاص نشانی
بی بی پاک دے نقش نیں سوہنے جتھے نور بھہاراں

اتھے سوہنا ” کعبۃ اللہ “ ” حجرِ اسود “ اتھے
جہاں تائیں دیکھ کے چمکن ساڈے دل دیاں تاراں

مولد پاک نبیؐ دا اتھے اُچیاں شاناں والا
وج قرآن دے جس دے بارے کیتیاں رب گفتاراں

پاک حرمِ ذا اک اک ذرہ پاک پوتر سوہنا
” غارِ حرا “ تے ” غارِ ثور “ نیں پاک مقدس غاراں

” جبلِ نور “ اوہ پہاڑ وی اتھے جتھے نور سی کھنڈیا
وجی الہی اتری جتھے ہوئیاں نور انواراں

پاک نبیؐ دا خاص اے حجرہ غارِ حرا وی اتھے
جتھے بہت قیام سی کردے پاک نبیؐ سرکاراں

پاک حرم دی شام وی سوہنی صبح سویر وی سندر
پاک حرم نوں رج رج تکاں دل دیاں اکھیاں ٹھاراں

پاک حرم دیاں سوہنیاں شانناں آقا پاک دے صدقے
پاک حرم وچ حاضر ہوواں سجدے خوب گزاراں

کفر شرک نوں ایس جگہ توں انج نابود اے کیتا
ایس جگہ تے ہو نہیں سکدیاں کفر دیاں یلغاراں

اٹھے پہر ای جتھے نجمی جنتی وادواں چلن
سوہنے پاک دوارے جا کے مہکن دل دیاں باراں

کے پاک دا خاص مقام اے اللہ دا گھر اتھے
اپر پاک مدینے دی کھج لیدی وچ حصاراں

.....☆.....☆.....

مدینہ پاک

اوتھے قسمت بن بن جاندی اوتھے پیار بہاراں
اوتھے رحمت مینہ ورساندی کھڑدیاں نیں گلزاراں

اوتھے نور زمین زمان دا اوتھے نور انواراں
اوتھے سارا حسن جہان دا سونہیاں سبزہ زاراں

اوتھے عرشوں نوری آندے فرشی تانگھاں رکھدے
اوتھوں ملدا آب حیاتى وسدیاں دل دیاں باراں

اوتھے سبھ دا محرم جانی ، ملدا وصل ربانی
اوتھے پیندی دل تے جھاتی اوتھے نور مہہاراں

اوتھے نور دے ہڑ پئے وگدے لٹ لٹ دیوے جگدے
اُس دھرتی نوں رج رج تکاں دل دیاں اکھیاں ٹھاراں

اوتھے سبھناں دے رج ہوندے حاجیاں دے حج ہوندے
اوتھوں ملدی پیار دی دولت چمکن دل دیاں تاراں

اوتھے اکھیاں فرش وچھاوَن نوری بوسے چاوَن
اوتھے جہڑا جاوے اُس دیاں ودھدیاں شان وقاراں

اوتھے رحمت لاندی جھڑیاں روح دیاں چڑیاں تڑیاں
اوتھے دل دے سجدے ہوندے نِشیاں ملن ہزاراں

دل وچ تانگھ اے دیکھاں جا کے اوہ اچیاں درباراں
منگدیاں جتھوں روپ بہاراں سبھ کھڑیاں گلزاراں

جھولیاں بھر بھر دیوں سبھ نوں خالی کدے نہ موڑن
میں دی ستے بھاگ جگاواں میں دی سینہ ٹھاراں

سوہنے ذکر دے چانن اندر میرا دم دم گزرے
ذکر محبت آپؐ دا کریئے کھنڈ جاون مہکاراں

آپؐ جیہا نہ کوئی وی جگ وچ دردی ساڈا آقاؐ
اُنج تے سار لئی اے ساڈی کنیاں ای غم خواراں

میں تہاڈی توصیف کیہ لکھاں میں عاجز میں قاصر
تہاڈا شان جہاناں کولوں اُچا اے سرکاراں

نال صحابہؓ کیتیاں آپؐ نے جہڑیاں گلاں باتاں
ساڈے لئی نہیں نور ہدایت تہاڈیاں سبھ گفتاراں

جتھے جتھے سوہنے آقا قدم مبارک رکھے
اوتھے اوتھے ونڈیاں جاون اج وی موہ مہکاراں

اپنی جان دے دشمن نوں پئے آپ دعاواں دیندے
ایہو جیہاں سوچاں لبھن اُچیاں وچ درباراں

جتھے نور سورا ہوندا خشبواں دا گھیرا
اوسے شہر مدینے اندر جا کے قلب نکھاراں

جتھے رحمت دے ہڑ وگدے ہر رنگ دے پھل کھڑدے
آپ دے روضہ پاک تے اپڑاں اپنی عرض گزاراں

طیبہ ، طابہ ، پاک مدینہ مٹھاتے من موہنا
سوہنے شہر مبارک جاواں بیٹری پار اتاراں

شہرِ نبیؐ دیاں ریاں دسو کون بھلا کر سکدا
شہرِ نبیؐ سبھ اوگن دھوندا رکھدا وچ حصاراں

روحِ نوں ٹپے ، اکھیاں ٹھارے ، روضہ پاک اُچیارا
جنتی باغِ بگیچے ونڈے خشبوداں مہکاراں

گنبدِ خضراؑ بھاگ جگامے عشقِ خزانے ونڈے
دیوے پیارِ شفاعت سبھ نوں رکھے سر دستاراں

پاکِ مواجہ سوہنا موہنا شانِ نرالی رکھدا
روضہ جنت ٹھنڈا اکھیاں دی ونڈے پیارِ بہاراں

عرشِ توں اُچی تھاں اے سوہنی آپؐ دے روضے والی
نورِ نرالا سبھ توں بالا کردا پُر انواراں

شہر نبیؐ وچ اٹھدے رھندے رحمت والے ہلے
شہر نبیؐ اے شانناں والا اُچا وچ دیاراں

شہر نبیؐ دا جہے اپنے دل وچ عشق رچایا
اودے اُتے رحمت والیاں وسدیاں رہن مہہاراں

اُٹھے پر بہاراں اوتھے رنگ خشبوداں وٹڈن
روح نوں ملدی لذت سوئی دل نوں چین قراراں

اوتھے گزرے گھڑیاں تے پل دل دے چین سہارے
اوتھے کرن سلاماں آؤن شکر لکھ ہزاراں

جے کر آقا کرم کماون سدن بردے تائیں
وچ مدینے جا بیٹھاں میں پیار نماز گزاراں

.....☆.....☆.....

روضہ پاک

روضہ پاک نبیؐ دا سوہنا روح نوں دوے نکھاراں
روضہ پاک نبیؐ دا سوہنا بخشے چین قراراں

جسم نوں وی ایہ تازہ کردا قلب نوں پاک معطر
روضہ پاک نبیؐ دا سوہنا، خشیاں دوے ہزاراں

ڈالی پاک دروداں والی پیش اے ہر کوئی کردا
چنگا ڈھیر اے لایا اتھے چاہت والے ہاراں

پیار شفاعت والیاں سنداں اوتھوں لبھدیاں سبھ نوں
روضہ پاک نبیؐ دا سوہنا رکھدا وچ حصاراں

قربت پاک نبیؐ دی اوتھے سوہنی پیاری ملدی
روضے پاک نبیؐ دے ساہویں چمکن دل دیاں تاراں

نوری رشاں لے کے جاندے سارے ایسے درتوں
سبھ دے روپ سجائے اِس دے سوہنے نقش نگاراں

جہڑا اِس دے مکھڑے تائیں چمدا اکھیاں تائیں
روضہ پاک نبیؐ دا اُس نوں دیوے پیار بہاراں

ایسے لئی تے ایس دوارے نوری آنا چاہندے
روضہ پاک نبیؐ دا ویکھ کے ودھدیاں شان وقاراں

روضے پاک نبیؐ دے نال اے سوہنی مسجد نبوی
سوہنا باغ اے جنتی سارا ونڈے نت مہکاراں

اِس دے وچوں تخبو پھدّی نور خزانے لبھدے
ایہ دنیا وچ رکھدی سبھ توں وکھرے نقش نگاراں

.....☆.....☆.....

مسجد نبویؐ

مسجد نبویؐ ونڈدی پئی اے سبھ وچ پیار بہاراں
ایہوں تکیاں دل وچ کھڑیاں آپے ای گلزاراں

دل دیاں اکھیاں کھول کے دیکھو ایہدے منظر سوہنے
نور و نور اے کیتا سبھ نوں ایہدے نور مناراں

اتھے سجدے آپؐ گزارے سوہنے پاک نبیؐ نے
ایہدی خشبو جنت ورگی دل موہون مہکاراں

روضہ پاک نبیؐ دا ایہدی سوہنی شان ودھاوے
پیار دا امرت ونڈ دیاں پیاں ایہدے نور دیاں دھاراں

پاک مدینہ آقاؑ دا اے پوری مسجد نبویؐ
ایہدی چاہت نور عقیدت دیوے نور نکھاراں

طیبہ دی گل چھڑ پئی لاکھیاں اتھراں دے نال بھجیاں
مسجد نبویؐ دل میں تک کے اپنے بخت سنواراں

مسجد نبویؐ اندر باہر راحت وٹڈی جاوے
مان ودھائے شان وی بخشے لیندی سبھ دیاں ساراں

ایتھے جہڑے بردے آندے تانگھاں سدھراں لے کے
سوہنے آقاؑ اوہناں تائیں کردے دان ہزاراں

شرقاں بخشے گنبد خضرا ایہدی سوہنی دکھ نوں
جنھوں تکیاں فرحت ملدی پائیے چین قراراں

.....☆.....☆.....

گنبد خضرا

گنبد خضرا سوہنا سوہنے رکھدا نقش نگاراں
گنبد خضرا سوہنا پاوے دل وچ ٹھنڈاں ٹھاراں

کیف تے مستی نال اے بھڑا دل تے اکھیاں تائیں
گنبد خضرا سوہنا مارے حسن دیاں لشکاراں

حسن جمال نے تیکے اس دا نور دی بارش ہووے
گنبد خضرا سوہنا وٹے سبھ وچ نور انواراں


ایہدے حسن دے جلوے نال ای ساڈے دل نیں بدھے
گنبد خضرا سوہنا ویکھاں اپنے لیکھ سنواراں

ایہدے حسن تے جھاتی پاون عرشوں آن ملائک
گنبد خضرا سوہنا سبھ نوں دیوے شان وقاراں

دل نوں پیار تسلی دیوے، اکھ نوں پیار دا سرمہ
گنبد خضرا سوہنا سانوں بخشے نور پہہاراں

اپنے لطف دا سایا ایہنے سبھناں تھیں پھیلایا
گنبد خضرا سوہنا رکھے اپنے وچ حصاراں

سوہنے سوہنے سارے ڈٹھے میں فاران دے جلوے
گنبد خضرا سوہنا نجی بخشے چین قراراں



فاران دے جلوے

آپُ دی رحمت شان وکھائی ویاں دل دیاں باراں
وچ فاران دے ہر پاسے ای ہوئیاں نور انواراں

آپُ دے نور نے بطحا دے سبھ ذرے نور بنائے
آپُ دے آیاں اتریاں سمھناں بھاگاں وچ گلزاراں

آپُ دی سوہنی ذات وکھائے سوہنے نور دے جلوے
آپُ دے نور شفاعت کیتیاں جگمگ دل دیاں غاراں

آپُ نے جدوں منور کیتی آ توحیدی مشعل
لکے ادھدے دل پروانے بھاویں کھادیاں ماراں

آپؑ نے شرک جہالت تائیں ہتھیں مار مکایا
شر نوں دور نسایا اوہدیاں روکیاں سبھ یلغاراں

مے توحیدی ورتائی سبھ حق دے طالبان تائیں
جہاں جہاں پیتی پایاں دل وچ ٹھنڈاں ٹھاراں

حق دا علم بلند چہ کیتا چڑھ فاران دی چوٹی
ٹھہر نہ سکیاں آپؑ دے سامنے جھوٹھ دیاں دیواراں

آپؑ تے لکھاں وار درود تے لکھاں وار سلام اے
آپؑ دے آیاں سوہنے آقاؑ جھکیاں دل دیاں تاراں

دل چاہندا فاران دے جلوے رج رج کے میں ویکھاں
نظر کرم دی پاؤ تے میں انجے عمر گذاراں

.....☆.....☆.....

عمر گزاراں

لکھدا رہاں میں نعت مقالے انجے عمر گزاراں
تکدا رہاں اُس نور دے ہالے انجے عمر گزاراں

میرے پیار دا مرکز محور گنبد خضریٰ پیارا
گھمدا راں میں آل دوالے انجے عمر گزاراں

جہاں دیاں جنت توں وی ودھ کے اُچیاں شاناں
دیکھاں میں اوہ شہر نرالے انجے عمر گزاراں

تھاڑے ناں دی تسلی کر دیاں میرا جیون لنگھے
اک اک ساہ انج کراں حوالے انجے عمر گزاراں

آپؑ نے آکے جھڑا سورج آقاؑ روشن کیتا
اُس دے ویکھاں ہور اُجالے انجے عمر گزاراں

مینوں دیوہ میرے آقاؑ اپنی دید دا شربت
بھر بھر پیواں پیار پیالے انجے عمر گزاراں

آپ دی مدحت والیاں نہراں انجے چلدیاں جاون
شعر میں لکھاں چمکن والے انجے عمر گزاراں

میرے آقاؑ پیار بہاراں وچ میں رہنا چاہواں
نور نگر دے ملن نوالے انجے عمر گزاراں

.....☆.....☆.....

بخشو پیار بہاراں

مینوں اپنے کول بلاؤ بخشو پیار بہاراں
خاص کرم دی جہات اک پاؤ رکھو وچ حصاراں

ترس گیا واں دیکھن نوں میں آقا پاک مدینہ
اکھیاں دی ہن پیاس بجھاؤ پاؤ نور مہہاراں

تھاڑے ذکر دے چاں اندر میرا دم دم گزرے
دل میرے نوں انج رشاؤ کر دیو روشن باراں

امیداں دے دیوے بال کے میں راہواں وچ بیٹھا
میرے سارے روگ مٹاؤ پا کے کجھ جھلکاراں

جہڑی تھاں تے قدم مبارک سوہنے آپ نے رکھے
مینوں اُس دی دید کراؤ رکھو وچ گلزاراں

سرودی بلدی میرے دل دی اس دھرتی دے اُتے
رحمت دا ہن مینہ ورساؤ میں وی سینہ ٹھاراں

اس دنیا دی دھپ دے نال میں اپنے آپ نوں لوہیا
میرے ستے بخت جگاؤ کرم کرو سرکاراں

1

اپنیاں دسیاں راہواں اُتے مینوں پا کے آقا
میری ہر اک تھوڑ مکاؤ بیٹری پار اُتاراں

لوکی آہندے تیرا جذبہ اجے وی کچا لگدا
اس جذبے نوں امر بناؤ رکھو وچ دلداراں

میں چاہنا واں فر اک واری سوہنا سفنہ تک لاں
جے کر تہاڈی جہات پوے تے وسن دل دیاں باراں

.....☆.....☆.....

سوہناسفہ

دیکھ لیا اے سوہنا سفہ اکھیاں نے سرکاراں
تکنا اے فر آپ دا روضہ اکھیاں نے سرکاراں

ساوا گنبد وچ تصور بجیا اے ہر ویلے
پل پل ایہو تکیا نقشہ اکھیاں نے سرکاراں

رُت خزاں دی مونہ پرتا کے لنگھدی جاوے دوروں
دیکھ لیا اے کھڑیا چنبہ اکھیاں نے سرکاراں

پیار دا ہڑ دی توڑ کے بنے آیا باہر ہن تے
خورے کد دا ڈکیا رستہ اکھیاں نے سرکاراں

طیبہ والی نور فضا وچ جا کے چین اے ملنا
وکیٹنا اے ہن سوہنا جلوہ اکھیاں نے سرکاراں

گونگے جذبے جدوں سلامی دین گے روئے اُتے
رو رو کے فر کرنا سجدہ اکھیاں نے سرکاراں

سوئے منظر طیبہ دے سبھ ویکھنے نیں ہن ایہناں
کرنا رو کے ٹھنڈا سینہ اکھیاں نے سرکاراں

ربیع الاول پاک مہینے دینی پیار سلامی
روشن کرنا خواب دریچہ اکھیاں نے سرکاراں



ربیع الاول

ربیع الاول پاک مہینہ وٹے پیار بہاراں
سر متھے تے چایا لہنوں آقا دے دلداراں

ایہدے آیاں خشبو دے سامان اکھٹے ہوں
سیرت ، نعت دے میلے لگن گلیاں وچ بازاراں

پیار دیاں سوغاتاں نال ایہ سبھ دے دامن بھردا
خلق دی خشبو انج ورتاوے اٹھدیاں نیں مہکاراں

رحمت والیاں داواں چلن دکھ تے درد مٹاون
رل مل سبھے خشیاں بوون کھڑدیاں نیں گلزاراں

روشنیاں دے پھل ورتاندے بدل پیار دے چھاندے
سوہنا سوہنی رحمت گھل کے وٹڈے نور پھہاراں

دل تے روح نیں نشی دے پاروں مستی دے وچ آؤندے
ایہناں تائیں ملدیاں رہندیاں ہر دم چین قراراں

نال نبیؐ جو چاہت رکھدی ہر اک جان اے راضی
جشن میلاد مناندے جہڑے نثیاں پان ہزاراں

سوہنیاں نوری گھڑیاں دے اسی صدقے سوہنے آقاؐ
جہڑیاں منگاں نیک دعاواں پادون شان وقاراں

سبھ نوں نور و نور اے کردا جشن میلاد نبیؐ دا
سبھ نوں نور دے ہالے رکھن پاک نبیؐ سرکاراں



پاک نبیؐ سرکاراں

عشق نبیؐ دی دولت چاہواں پاک نبیؐ سرکاراں
 ہر دم نور ہدایت چاہواں پاک نبیؐ سرکاراں

دل دیاں اکھاں کھول کے رکھاں ایس لئی ہر ویلے
 آپؐ دی پاک زیارت چاہواں پاک نبیؐ سرکاراں

طیبہ دے ادھ رنگ سجیلے اکھیاں دے وچ پھر دے
 تنکا فر ادھ جنت چاہواں پاک نبیؐ سرکاراں

تہاڈی چاہت ' پیار محبت سوئی قربت خاطر
 کجھ گھڑیاں دی مہلت چاہواں پاک نبیؐ سرکاراں

صل اللہ دا کراں وظیفہ جد تک موت نہیں آندی
ایس عمل لئی فرصت چاہواں پاک نبی سرکاراں

خاک بناں میں آپ دے در دی آقا مدنی ماہی
مل جاوے ایہ عزت چاہواں پاک نبی سرکاراں

وچ بدر جو ونڈی آپ نے اپنے وچ اصحابہ
امت لئی اوہ نصرت چاہواں پاک نبی سرکاراں

آپ ملے تے ملیا رب توں سوہنا نور خزانہ
آپ توں آپ دی رحمت چاہواں پاک نبی سرکاراں

جھولی پا کے نیک دعاواں پاک دوارے آیا
تھاڑے پیار دی نعمت چاہواں پاک نبی سرکاراں

.....☆.....☆.....

دعاواں

سبھ توں پہلاں ہار سلام دے پھل درودی داراں
فر میں پیارے آقا اگے رو رو عرض گزاراں

کملی والیا شاہا ، مینوں کر کملی دے اوہلے
وانگ بلاواں ظالم دشمن کھوندے چین قراراں

ترلے، ہاڑے جھولی پا کے آیا پاک دوارے
میرے اکھراں نوں رشنا دے روواں زار نزاراں

اُمت دا جو حال اے ہویا اوہ نیں لکيا تہاتھوں
گمراہی دے ولے ٹریاں ایہدیاں فکر افکاراں

استمدادی طاقت لیہنوں اپنے جال اچ پھایا
ایسے لئی تے ایہدے اُتے پیاں نیں پھٹکاراں

اندروں وی بے حال اے کیتا استحصالی ٹولے
اپنا آپ جدوں وی تیکے آندیاں شرماں عاراں

ساڈے اپنے دشمن بن کے سانوں ای پئے مارن
رہبر بودے ظلم کماندے بہہ کے وچ کچھاراں

اسیں زوالاں اندر ڈگے آپ دا اُسوہ بھل کے
درد سمندروں کڈھ کے سانوں لے لئو وچ حصاراں

بے عملی بے شرمی والی دلدل وچ آں پھسے
سوہنے آقا بخشو سانوں عزت دیاں دستاراں

اپنی پیاری نعت دے صدقے بخشو اوگن ساڈے
جہات کرم دی پا کے آقا کر دیو نیک اطواراں

امن دی بھکھیا منکدے میرے رت بھنے ایہ اکھر
ایہناں اُتے رحمت تہاڈی پاوے نور پھہاراں

بے ہمتے بے آئے سانوں نا اتفاقی کیتا
روگ گوا دیو ساڈے دل دے پائیے ہن چھٹکاراں

چیلے اج شیطان دے بن گئے یورپ تے امریکہ
ایہناں تائیں ہوں آقا ہر میدانے ہاراں

پاکستان دے اندر آقا پھر جائے وا ہن ایسی
ہر پاسے ای چلن اتھے عدل دیاں پرکاراں

ایہ قرآن اعجاز تھاڈا ساڈے کول اے جہڑا
عالم سانوں کر دیوہ ایہدا بخشو نور انواراں

ساڈا سربند جڑ جاوے جے نور قرآنی تائیں
فیر کفر دے ٹھیریاں اندر کر دیئے چکاراں

آقا سوہنے آپؐ نے میرا بھرم سدا ای رکھیا
ایسے لئی میں بناں سوالی بخشش دے درباراں



(تعارفی خاکہ)

نام محمد اقبال نجمی ولدیت محمد اسماعیل تعلیم ایم اے (پنجابی)
تاریخ پیدائش 4- جنوری 1953ء جائے پیدائش مدرچک - چوکی
پتا 88- بی سیٹلائٹ ٹاؤن گوجرانوالہ فون: 055-3251603
ڈائریکٹر فروغ ادب اکادمی - پاکستان
صحافتی خدمات چیف ایڈیٹر ”مفیض“، ”دلچسپ“، ”جام صحت“
ایڈیٹر ساحل انٹرنیشنل ڈنمارک

پنجابی تصانیف

1985ء	سیرت حضور ﷺ دی	1983ء	عمر وں وڈے ڈکھ
1987ء	دھرتی میرا مان	1985ء	ٹم ٹم تارے
1988ء	سچے موتی	1988ء	کھڑ دے پھل
1989ء	ایہ نہیں میرا پاکستان	1989ء	تن وستی وچ درد بلاواں
1993ء	شکرانہ	1989ء	سک دی ڈالی
1995ء	محاوراتی غزلاں	1992ء	مہکاں ونڈ دے بول
1998ء	سے دا بھار	1997ء	اپنا اپنا فرض بھائیے
2007ء	نوری ریشاں	2001ء	حمد چراغ دلاں دا چانن

اردو تصانیف

1984ء	ہم کلیاں ہم تارے	1984ء	قدم قدم آباد
1984ء	سارے دیے جلادو	1984ء	تتلی بچہ پھول
1987ء	پھول اور بارود	1987ء	سوچ کے زاویے
1990ء	نعتیہ ہائیکو	1988ء	آپ ﷺ کی باتیں
1991ء	آزادی کا سفر	1991ء	گوجرانوالہ کے اہل قلم
1998ء	شوکت واسطی فن و شخصیت	1994ء	پاکستانی آزاد غزل
2001ء	دل نہیں مانتا	1999ء	اجازت
2003ء	خیرات مدحت	2003ء	میری آواز
2005ء	نغمہ محمد	2003ء	Angels of Thought
2006ء	پھول کھلتے ہوئے	2006ء	زرگس کے پھول



نعت اودہ خوش قسمت نے بلند بخت سے کہا ہے ہر
ہر صدی دے شاہراں توں تاراج دلاں آج سراج
نعت ہر بیت، ہر کتب نے ہر سلوک دے ہر حال دے ہر صورت

سخنور دی ادبی، شعری نے نظریاتی ملاحیتاں دے ہر حق دے ہر حق دے ہر حق دے
صنف نوں دیکھئے تے نعت عربی، فارسی، اردو تے خیالی دیان شاہراں دے ہر حال دے ہر حال دے
تے فکری وابستگی دے کدی نہ مرجھان والے مگد تے ہر حال دے ہر حال دے ہر حال دے
ثابت تے کعب بن زہیر دے مجازی ماحول توں اجڑے خیالی تصنیف دے ہر حال دے ہر حال دے
نعتیہ ”نوری رشاں“ تیک کئے قصیدے دے ہر حال دے ہر حال دے ہر حال دے
دامانی سانوں فقط ”نوری رشاں“ دے انوار دی بارگاہ سماں دے ہر حال دے ہر حال دے

محمد اقبال مجی دے نعتیہ قصیدہ نوری رشاں محبت رسول ﷺ دے ہر حال دے ہر حال دے
چوں محبوب کائنات ﷺ دے لافانی خاصائص و کمالات دے ہر حال دے ہر حال دے
صیرت، عرب دے صحرائیںیاں نوں قیصر و کسریٰ دے مقدر دے ہر حال دے ہر حال دے
شفیع المذنبی، مولادت باسعادت، عشق و سستی تے ذوق و عشق دے ہر حال دے ہر حال دے
عرب دی بنجر زمین تے رحمت دے گلاب کھڑان والا انقلاب دے ہر حال دے ہر حال دے
”نوری رشاں“ بے شمار عنوانات نالی مزین شاہ جاز دے ہر حال دے ہر حال دے
محبت رسول ﷺ دے رستے تے چلن والیاں لٹی سنگ میل دے ہر حال دے ہر حال دے
طور تے غیر مرد ف اے پر کچھ اشعار دا شعری حسن مرذف روایت ان دے ہر حال دے

ایس نعتیہ قصیدے دا اک ہور واحد اور جمال دے ہر حال دے ہر حال دے
ترجمہ چل رہیا اے۔ حدیثاں دا ایہ نوعی پرکاش دے ہر حال دے ہر حال دے
روحانی سوز دازندہ ثبوت اے۔ آکھن نوں تے ہر حال دے ہر حال دے
ایس فانی انسانی دے سر تے لافانیت دا سماج نگار دے ہر حال دے ہر حال دے
”نوری رشاں“ دے عشق محمد ﷺ دی ازلی تے ابدی شان دے ہر حال دے ہر حال دے
ایہناں لٹی بھائے دوام دے دربار دے ہر حال دے ہر حال دے

آپ توں آج دے ہر حال دے ہر حال دے

